

四庫全書

經部

欽定四庫全書

經部

詩經疏義會通卷二

詳校官監察御史_臣盛嘉祐

通政使司副使_臣莫瞻菴覆勘

總校官編修_臣倉聖脉

校對官典簿_臣劉景岳

謄錄監生_臣胡浚

欽定四庫全書

詩經疏義會通卷二

元 朱公遷 撰

邶一之三

邶鄘衛三國名在禹貢冀州西阻太行北逾
衡漳東南跨河以及兖州桑土之野及商之
季而紂都焉武王克商分自紂城朝歌而北
謂之邶南謂之鄘東謂之衛以封諸侯邶鄘
不詳其始封衛則武王弟康叔之國也

輯錄
通釋

曰武王作酒誥戒康叔而曰明大命於妹邦
妹邦即紂都則康叔封衛明在武王時矣邶
邶之地豈始為武庚三叔之封至成王滅武
庚誅三監乃復以封他國而其後又并入於
衛也

衛本都河北朝歌之東淇水之北百泉

之南其後不知何時并得邶鄘之地至懿公
為狄所滅戴公東徙渡河野處漕邑文公又
徙居於楚丘朝歌故城在今衛州衛縣西二
十二里所謂殷墟衛故都即今衛縣漕楚丘
皆在滑州大抵今懷衛澶

音

相滑濮等州開

封大名府界皆衛境也

輯錄懷州今懷慶府衛州今衛輝府相州

今彰德府開封府今仍舊並隸河南大名府今仍舊澶州今開州滑州今滑縣並隸北京

濮州今東昌府濮州隸山東

但邶鄘地既入衛其詩皆為

衛事而猶繫其故國之名則不可曉

或謂得之於邶

者係之邶得之衛邶係之衛邶或謂三國之音不同故仍其舊為三國二說未知是否

而舊說以此下十三國皆為變風焉

程子曰衛之并

邶鄘之地變風以衛為首所以著衛之惡也輯錄竹房張氏曰正風以關雎為首者得夫

婦人倫之至正者也變風以邶鄘舟為首者莊姜處夫婦人倫之變者也次邶栢舟者處母子

之寢者也蘇氏曰春秋所見百七十餘國變風之作春秋數世矣而載於大師者獨十三國意者列國不皆有詩其有詩者雖檜曹之小邾邾之亡而有不能已者

汎

芳劍反

彼栢舟亦汎其流耿耿

古幸反

不寐如有隱憂微

我無酒以敖

五羔反

以遊

比也汎流貌栢木名耿耿小明憂之貌也

輯錄輔氏曰蓋人有

所憂則其心耿耿然故不能寐也

隱痛也微猶非也○婦人不得於

其夫故以栢舟自比

輯錄通釋曰有全章皆屬比者亦有比意之外繼陳其事者如

此章之類今以集傳賦而比之體反言以栢為舟堅觀之則此類恐亦可以為比而賦也

綴音稚密也

牢實

貞固有守亦若是也

而不以乘載無所依薄但汎

然於水中而已故其隱憂之深如此非為無酒可以

遨遊而解之也

增釋許氏曰此章言栢舟則宜以載物乃汎汎於水中而無所用以此喻

已故耿耿而憂思至於不能寐如有所隱痛之憂非無酒以自樂然此憂非酒之所能遣也

列女

傳以此為婦人之詩今考其辭氣卑順柔弱且居變

風之首而與下篇相類豈亦莊姜之詩也歟

栢舟與關雎

巢為反對而處變以常不愧於后妃夫人之化所以首變風而繼二南也輯錄鄭氏曰莊姜莊公夫人齊

女姓姜氏

○我心匪鑒不可以茹

如預反

亦有兄弟不可以據薄言

往愬逢彼之怒

賦也鑒鏡茹度據依愬告也○言我心既匪鑒而不

能度物雖有兄弟而又不可依以為重故往告之而

反遭其怒也

增釋許氏曰此章言鑑明則可度物我

告諸兄弟聊以舒此憤爾而又逢彼之怒是兄弟亦不可據憑而終莫知所以自處也

○我心匪石不可轉也我心匪席不可卷

卷勉反

也威儀

棣棣不可選也

賦也棣棣富而閒習之貌

輯錄輔氏曰富謂富盛也富盛則全備而無欠缺閒

習則從容而不生疎

選簡擇也○言石可轉而我心不可轉席

可卷而我心不可卷威儀無一不善又不可得而簡

擇取舍皆自反而無闕之意

不可轉其志確也不可卷其節堅也不可選其

德備也存諸中者不可移形於外者無不善莊姜之賢具於此章○增釋許氏曰此章於是自反平昔我心貞固過於石而不可轉我心平直過於席而不可卷威儀動止之間皆無一失而不必選而不見答於君子豈我心之過哉石不可轉是其貞潔自守之操堅席不可卷足其公平逮下之心薄也

○憂心悄悄

七小反

愠于羣小覲

古豆反

閔既多受侮不少靜

言思之寤辟

避亦反

有標

符小反

賦也悄悄憂貌愠怒意羣小衆妾也言見怒於衆妾

也覲見閔病也辟拊心也標拊心貌

此章言已所以憂之之事不得

於其夫則必見侮於其下理勢然也輯錄爾雅注標推宵也○增釋許氏曰此章謂我之憂者自揆無過正以見怒諸妾讒譖而致然默而思之無可奈何惟拊心而已

○日居月諸胡迭

待結反

而微心之憂矣如匪澣

戶管反

衣

靜言思之不能奮飛

比也居諸語辭迭更微虧也

輯錄嚴氏曰微謂不明也日月食則不明十月

之交云彼月而微此日而微

匪澣衣謂垢汙不濯之衣奮飛如鳥

奮翼而飛去也○言日常常明月則有時而虧猶正

嫡當尊衆妾當卑今衆妾反勝正嫡是日月更迭而

虧是以憂之至於煩冤憤

古對反心亂也

眊

音冒蒙蒙目不明之貌

如

衣不澣之衣恨不能奮起而飛去也

婦人從一而終無可去之理惟

安於義命而已○增釋此章再言上下失序所以憂不能解但恨不可飛去耳憂之極止曰不能奮飛是

不可以去謂正而不怨也

栢舟五章章六句

一章言德不見取於夫而二章則內外俱困也三章言德

不備於已而四章則上下俱困也五章則以無可奈何而自安之意結之輯錄解頤曰莊姜不得志於夫而無怨夫之意不見禮於兄弟而無絕兄弟之情不見愛於衆妾而無怨衆妾之心而所以自反者惟知心志不可以不專一威儀不可以不閑習使惡我者無得而簡擇怒我者無得以瑕疵亦可謂善自處矣此所以居變風之首也歟○增釋許氏曰此詩舊說男子作朱子以為婦人詩蓋觀其辭氣而得之而卑順柔弱四言舉一篇大旨此讀詩凡例也讀詩者每於一詩吟哦上下優游涵泳以意隨之而求詩人志之所在庶不負朱子之教也

綠兮衣兮綠衣黃裏心之憂矣曷維其已

比也綠蒼勝黃之間色黃中央土之正色

輯錄青黃赤白黑為

之正色綠紅碧紫黼為之間色木克土故蒼勝黃

間色賤而以為衣正色貴

而以為裏言皆失其所也已止也○莊公惑於嬖妾

輯錄莊公楊武公子嬖妾蓋公子州吁之母嬖幸也愛也

夫人莊姜賢而失位故

作此詩言綠衣黃裏以比賤妾尊顯而正嫡幽微

輯錄

孔氏曰間色為衣而見正色反為裏而隱猶妾蒙寵而顯夫人反見疎而微也

使我憂之不

能自己也

輯錄謝氏曰嫡妾易位尊卑不明家不齊則國不治莊姜之心豈但憂一身哉為君

憂為君之子憂為國家後日憂其憂何時能止也

○綠兮衣兮綠衣黃裳心之憂矣曷維其亡

比也上曰衣下曰裳記曰衣正色裳間色今以綠為

衣而黃者自裏轉而為裳其失所益甚矣

幽微已不可卑賤尤

不可輯錄孔氏曰間色為衣而在上正色為裳而處下猶妾蒙寵而尊夫人反見疎而卑前以表裏喻幽顯此以上下喻尊卑○增釋前以掩蔽而言此以倒置而言皆夫人之失位也亡之為言忘

也

○綠兮絲兮女

音汝

所治

平聲

兮我思古人俾無訖

音尤叶于其反

兮

比也女指其君子而言也治謂理而織之也俾使說
過也○言緣方為絲而女又治之以比妾方少艾而
女又嬖之也然則我将如之何哉亦思古人有常道
此而善處之者以自勵焉使不至於有過而已

輯錄
輔氏

曰彼之所為自違悖而我之所為則
欲其無過而已此其所以為賢也

○絺兮綌兮淒

七西反

其以風

叶為
惜反

我思古人實獲我心

比也淒寒風也○絺綌而遇寒風猶已之過時而見

棄也故思古人之善處此者真能先得我心之所求

也

年有老少則恩有隆替此理之必然無足怪者但思古人而俾無訖則取法於彼以免過也思古人而獲我心則彼已同然而過可免矣○增釋許氏曰此章之思古人反謂之獲我心是在我者處之素定而古人善處此者反得我心之所同然者耳至此豈有一毫怨懟不平之氣哉此莊姜所以為賢也

綠衣四章章四句

莊姜事見春秋傳此詩無所考姑從序說下

三篇同

前二章發乎情後二章止乎禮義前二章則觀事勢顛倒而傷其變後二

章則察時運盛衰以處其變輯錄解頤曰前之憂憂今日過此而無聊也後之思思古人處此之有道也然古人之處此亦豈有它道哉亦曰安於義命而已矣陳定宇曰不得於

夫而不疾其妾惟思古人以自修其身憂而不傷怨而不怒孔子謂詩可以怨其此類也

燕燕于飛差

初宜反

池其羽之子于歸遠送于野

叶上反

瞻

望弗及泣涕如雨

興也燕音也

音壹

也謂之燕燕者重言之也差池不齊之

貌

相隨而飛一先一後也

之子指戴嬀也歸大歸也

婦人已嫁復歸宗曰

大歸大歸者不反之義輯錄郊外曰野無聲出涕曰泣

○莊姜無子以陳女戴

嬀之子完為已子莊公卒完即位嬀人之子州吁弑

之故戴嬌大歸于陳

輯錄左傳莊公又娶於陳曰厲嬌生孝伯早死其婦戴嬌生完

是為桓公隱公四年州吁弑之厲戴皆謚為陳姓也而莊姜送之作此詩也

相彼

隨而不離此遠送而難別意有相類故用起興輯錄蘇氏曰禮婦人送迎不出門遠送于野情之所不能已也嚴氏曰風人含不盡之意此但叙離別之恨而子弑國危之戚皆隱然在不言之中矣

○燕燕于飛頡

戶結反

之頡

戶郎反

之子于歸遠于將之

瞻望弗及佇立以泣

興也飛而上曰頡飛而下曰頡將送也佇立久立也

○燕燕于飛下上

時掌反

其音之子于歸遠送于南

心叶尼反

瞻望弗及實勞我心

興也鳴而上曰上音鳴而下曰下音送于南者陳在

衛南

韻之頤之飛相上下也下上其音聲相應和也皆不忍相違之意輯錄輔氏曰泣涕如雨初別

時也佇立以泣已別而久立以泣也實勞我心既去而思之不忘也

○仲氏任

而今反

只

音紙

其心塞淵

叶一均反

終溫且惠淑慎其

身先君之思以勗

古肉反

寡人

賦也仲氏戴嬀字也以恩相信曰任只語辭塞實淵

深終竟溫 and 惠順淑善也

塞實則不虛妄淵深則不淺露溫和則不剛愎惠順

則不乖戾以此淑慎其身可謂賢矣而先君謂莊公又相勉以思先君二南之外無此勝妄

也勗勉也寡人寡德之人莊姜自稱也○言戴嬀之

賢如此又以先君之思勉我使我常念之而不失其

守也

此章備言嫡媵相與如此以見涕泣勞心之故也輯錄疏云仲氏有德行其心誠實而深遠又

終能溫和恭順善自謹慎其身內外之德既如此又於將歸之時以思先君之故勸勉寡人以禮義也

楊氏曰州吁之暴桓公之死戴嬀之去皆夫人失位

不見答於先君所致也而戴嬀猶以先君之思勉其

夫人真可謂溫且惠矣

輯錄朱子曰古人文字之美詞氣溫和平義精密如此秦

漢以後無此等語某讀詩於此數語讀書至先王肇修人紀至茲惟艱哉深誦歎之又曰譬如畫工傳神一般直是寫得他精神出

燕燕四章章六句

前三章述己之情後一章美偽之德輯錄解頤曰余讀是

詩未嘗不歎莊公之狂感也使其翻然悔悟立莊姜以為之主仰戴以為之助則閨門正矣立子完以為之嫡命石蜡以為之輔則國本定矣若州吁者可教則姑教之不可教則去之夫如是則衛非今日之衛即康叔武公之衛矣顧乃以寵奪正以孽奪宗卒貽國家無窮之禍不謂之狂感而可乎

日居月諸照臨下土乃如之人兮逝不古處

昌品反

胡能

有定寧不我顧

叶果
五反

賦也日居月諸呼而訴之也之人指莊公也逝發語

辭古處未詳或云以古道相處也

輯錄王氏曰不以古夫婦之道處我

胡寧皆何也○莊姜不見答於莊公故呼日月而訴

之言日月之照臨下土久矣今乃有如是之人而不

以古道相處

輯錄輔氏曰觀綠衣之詩所謂我思古人則於此歎莊公不以古道處已者宜

也自處以古人為法而望人以古道處已莊姜之處已望人皆有則矣

是其心志回惑

亦何能有定哉而何為其獨不我顧也見棄如此而

猶有望之之意焉此詩人所以為厚也

輯錄四胡有定期之辭

謂今其心回惑何時而能定乎此莊姜忠厚之意也朱子說是已然之辭通釋曰每章章末二句皆有望之意

○日居月諸下土是冒乃如之人兮逝不相好

呼報反胡

能有定寧不我報

賦也冒覆也報答也

○日居月諸出自東方乃如之人兮德音無良胡能有定俾也可忘

賦也日旦必出東方月望亦出東方德音美其辭無

良醜其實也

雖若美而實則醜矣

俾也可忘言何獨使我為可

忘者耶

莊姜之賢可親不可忘者也而莊公忘之何哉

○日居月諸東方自出父兮母兮畜我不卒胡能有定

報我不述

賦也畜養卒終也不得其夫而歎父母養我之不終

蓋憂患疾痛之極必呼父母人之至情也

增釋呼日月而訴之

猶未極其情呼父母而訴之其憂患之情極其至也

述循也言不循義理也

始責

其不以古道處我終責其不循義理以報我性情之厚而發於正者也報我不述於終風首章可見

日月四章章六句

呼日月而怨其夫則又望焉者也呼日月而怨父母則絕

意於夫無所望也

此詩當在燕燕之前下篇故此

終風

有惠來之時則公猶未絕於姜也栢舟有往愬之語則姜猶冀夫兄弟之助己也綠衣思古人日月呼父母則無可奈何亦已而已四詩次第當然

終風且暴顧我則笑

叶音燥

謔

許約反

浪笑敖

五報反

中心是

悼

比也終風終日風也暴疾也謔戲言也浪放蕩也悼

傷也○莊公之為人狂蕩暴疾莊姜蓋不忍斥言之

故但以終風且暴為比言雖其狂暴如此然亦有顧

我則笑之時但皆出於戲慢之意而無愛敬之誠

輯錄

顧我則笑是不禮其夫人而不能相敬如賓可見矣

則又使我不敢言而心獨

傷之耳蓋莊公暴慢無常而莊姜正靜自守所以忤

其意而不見答也

輯錄忤音悞逆也違戾也

○終風且霾

亡皆反叶音狸

惠然肯來

叶如字又陵之反

莫往莫來悠

悠我思

叶新才新齋二反

比也靈雨

去聲

土蒙霧

音茂又音夢

也

輯錄爾雅曰大風揚塵土從上而下也

惠順也悠悠思之長也○終風且霾以比莊公之狂

惑也雖云狂惑然亦或惠然而肯來

輯錄毛氏曰時有順心也

但

又有莫往莫來之時則使我悠悠而思之望其君子之深厚之至也

○終風且曠

於計反

不日有曠寤言不寐願言則嚏

都麗反

比也陰而風曰曠有又也

輯錄古有又通

不日有曠言既曠

矣不旋日而又曠也亦比人之狂惑暫開而復蔽也

願思也嚏孰

音

嚏也

輯錄禮記月令民多孰嚏陳氏曰孰者氣室於鼻嚏者聲出於

口皆肺疾也

人氣感傷閉鬱又為風霧所襲則有是疾也

輯錄輔氏曰寤則憂而不能寐思之則感傷氣閉而成疾其憂危甚矣

○瞠瞠其陰虺虺其雷寤言不寐願言則懷

叶胡根反

比也瞠瞠陰貌虺虺雷將發而未震之聲

輯錄呂氏曰驟雨迅

雷其止可待至於瞠瞠之陰虺虺之雷則殊未有間霽之期也

以比人之狂惑愈深

而未已也

比不日有瞠為尤甚

懷思也

終風四章章四句

說見上

始則怨其愛之不誠次則怨其來之不繼始則怨其迷惑之不悟終則怨

其迷惑之漸深輯錄許氏曰莊姜賢夫人也所思者大矣國君及夫人父母一國而國人作則者也莊公無君人儀度其曰終風且暴曰霾暄陰雷曰譁浪笑傲為君如此果足正一國乎夫人賢而不見答果足以示人齊家之道乎國君之家不齊則一國之家不齊一國之家不齊則國殆矣夫人之中心是悼悠悠之思寤而不寐願言而嚏而懷所思者大矣非情欲之謂也儻莊姜為思情欲之人則譁浪笑傲而必喜陰暄虺雷而必怒矣解頤曰變風之始於莊姜何也曰婦人夫其所天也以夫則任惑妄其所使也以妾則上僭子其所恃賴以終身也以子則暴而無禮莊姜之處此亦難矣雖遭人倫之變而不失乎天

理之常則莊姜亦賢矣哉
是可以為處變者之法矣

擊鼓其鏜

叶當反

踊躍用兵

叶脯芒反

土國城漕我獨南行

叶戶

反郎

賦也鏜擊鼓聲也踊躍坐作擊刺之狀也兵謂戈戟

之屬土土功也國國中也漕衛邑名

輯錄漕邠地在河南增釋

鄆陽張氏曰西征記今白馬城衛之漕邑今滑州白馬縣

○衛人從軍者自言其

所為因言衛國之民或役土功於國或築城於漕而

我獨南行有鋒鏑死亡之憂

輯錄鋒兵端也鏑音滴矢鋒也

危苦尤

甚也

此章言其啓行之事而怨之輯錄李迂仲曰土國城漕非不勞苦而獨處於境內今我之在外

死亡未可知也鄭氏曰南行從軍南行伐鄭

○從孫子仲平陳與宋不我以歸憂心有忡

救中反叶救衆反

賦也孫氏子仲字時軍帥也平和也合二國之好也

輯錄胡氏曰必先和陳宋而後進兵也

舊說以此為春秋隱公四年州

吁自立之時宋衛陳蔡伐鄭之事恐或然也

輯錄左傳隱公

四年衛州吁弑桓公而自立將修先君之怨於鄭而求寵於諸侯使告於宋曰君若伐鄭以除君害君為主敝邑以賦與陳蔡從宋人許之夏宋陳蔡衛伐鄭圍其東門五日而還秋四國復伐鄭敗鄭徒兵取其

禾而還朱子曰圍鄭五日而還出兵不為久而怨之如此者自犯大逆衆叛親離莫肯為之用者矣以猶與也言不與我而歸也

此章本其啓行之故而怨之

○爰居爰處爰喪

息浪反

其馬

叶滿補反

于以求之于林之下

叶後五反

賦也爰於也於是居於是處於是喪其馬而求之於林下見其失伍離次無鬪志也

此章陳其怠慢之狀而怨之

○死生契

古結反

闊

叶苦劣反

與子成說執子之手與子偕老

叶魯吼反

賦也契闊隔遠之意成說謂成其約誓之言○從役者念其室家因言始為室家之時期以死生契闊不相忘棄又相與執手而期以偕老也

此章述其室家之情而怨之

○于

音吁下同

嗟闊

叶苦劣反

兮不我活

叶戶劣反

兮于嗟洵

音荀

兮不

我信

叶師人反

兮

賦也于嗟歎辭也闊契闊也活生洵信也信與申同○言昔者契闊之約如此而今不得活偕老之信如此而今不得伸意必死亡不復得與其室家遂前約

之信也

此章極其室家之思而怨之

擊鼓五章章四句

輯錄解頤曰役土功於國者此民也築城於漕者亦此民

也南行而平陳與宋者又此民也先王之於民也不得已而用之則必先其所急後其所緩未聞衆役並興罷民之力以逞己之志若斯之甚者也是亦可謂忍矣其卒至於敗亡哉也宜

凱風自南

叶尼反

吹彼棘心棘心天天

於驕反

母氏劬勞

叶

僚

比也南風謂之凱風長養萬物者也棘小木叢生多

刺難長而心又其稚弱而未成者也

輯錄許氏曰字書棘如棗而多

刺木堅色赤叢生白色為白棘實酸者為棘棘

天天少好貌劬勞病苦也○

衛之淫風流行雖有七子之母猶不能安其室故其

子作此詩以凱風比母棘心比子之幼時

此章言母不言子是

直以凱風比母棘心比子之幼時也

蓋曰母生衆子幼而育之其劬勞

甚矣

輯錄嚴氏曰棘至夏始生凱風南來吹彼稚弱之棘心至於天天然少好則風之為力多矣比

母以慈愛之情養我七子之身至於少長則母亦當苦矣母之養子於少時最勞苦本其始而

言以起自責之端也

○凱風自南吹彼棘新母氏聖善我無令人

興也

輯錄通釋曰上章言凱風棘心而下句無應故屬比此章言風與棘而下文以母與子應故屬

興二章相似而不同也

聖叡令善也

棘可以為薪則成矣然

非美材故以興子之壯大而無善也

此章言母氏又言子則是以凱

風興母棘心興子蓋美惡之不相類為興

復以聖善稱其母而自謂無令

人其自責也深矣

輯錄劉執中曰自言七子之中有一令善之人則母亦不舍之而去

○爰有寒泉在浚之下

叶後五反

有子七人母氏勞苦

興也浚衛邑

增釋鄴陽張氏曰寒泉在濮州濮陽縣東南水經注濮水枝津東逕浚城南而

北去濮陽三十五里城側有寒泉岡
即詩寒泉浚下浚都陳留曰浚儀

○諸子自責言

寒泉在浚之下猶能有所滋益於浚而有子七人反

不能事母而使母至於勞苦乎

泉有益浚之理人無事母之能人不如物

所以為興

於是乃若微指其事而痛自刻責以感動其母

心也母以淫風流行不能自守而諸子自責但以不

能事母使母勞苦為詞

輯錄孔氏曰此謂母今日勞苦思嫁與上章仍勞不同也

婉詞幾諫

增釋邴陽張氏曰事父母幾諫幾微也內則篇父母有過下氣怡色柔聲以諫也

不顯其親之惡可謂孝矣下章放此

○覲

胡顯反

睨

華板反

黃鳥載好其音有子七人莫慰母心

興也覲睨清和圓轉之意○言黃鳥猶能好其音以

悅人而我七子獨不能慰悅母心哉

此亦以人不

凱風四章章四句

一章起自責之端二章極自責之義三章四章主於自責

而有微諷之意焉凱風親之過小者也然以他人言之則不免乎怨而其子之負罪引慝如此但小弁其一時發見之良心耳此則真誠實意哀痛懇切欲以感悟其親二詩不

能無問也

雄雉于飛泄泄

移世反

其羽我之懷矣自詒伊阻

興也雉野雞雄者有冠長尾身有文采善鬪泄泄飛

之緩也懷思詒遺

去聲

阻隔也○婦人以其君子從役

于外故言雄雉之飛舒緩自得如此而我之所思者

乃從役於外而自遺阻隔也

物得自由人不如物故以起興

之懷矣指其夫也自詒伊阻不以怨人也

○雄雉于飛下上

反時掌

其音展矣君子實勞我心

興也下上其音言其飛鳴自得也展誠也言誠又言

實所以甚言此

蜺錄此字或作其字

君子之勞我心也

上章托物為君

子之行役勞苦而起興此章托物為已之思念勞役而起興也
輯錄輔氏曰言有盡而意無窮也

○瞻彼日月悠悠我思

叶新齋反

道之云遠曷云能來

叶陵之反

賦也悠悠思之長也見日月之往來而思其君子從

役之久也

輯錄鄭氏曰視日月之行迭往迭來今君子獨久行役而不來使我心悠悠然思之

○百爾君子不知德行

下孟反叶戶郎反

不忮

之政反

不求何用

不臧

賦也百猶凡也忮害求貪臧善也○言凡爾君子豈

不知德行乎若能不忮害又不貪求

仁則不忮義則不求此則所謂

德行也

則何所為而不善哉憂其遠行之犯患冀其善

處而得全也

思君子之詩多矣而未有及於德行者此雄雉所以為最賢也輯錄呂氏曰思

其君子之切而知其未得歸也於是自解曰凡百君子但不忤害不貪求則何所用而不善雖久處軍旅之間固無患也胡氏曰此亦發乎情止乎禮義之意

雄雉四章章四句

前三章極思之心後一章致願之意輯錄解頤曰此

詩則雖思之之切是亦情之正也惟其思之也切故其憂之也深惟其憂之也深故其勉之也至意不忤不求此孔門克己之術求仁之方而行役之婦人能言之其亦可謂賢也已此其所以為先王之遺澤也歟

匏有苦葉濟有深涉深則厲淺則揭

苦例反

比也匏瓠

音也

輯錄碑雅曰長而瘦上曰瓠短頸大腹曰匏蓋匏苦而瓠甘復有長短之

殊非一物也

匏之苦者不可食特可佩以渡水而已然今

尚有葉則亦未可用之時也

輯錄范氏曰深則厲其葉枯落然後乾之佩以

渡濟渡處也行渡水曰涉以衣而涉曰厲

水自帶已上至心曰

厲渡水不裸體故著裏衣而渡也

褰衣而涉曰揭

輯錄爾雅曰褰膝以下為揭

膝以上為涉繇帶以上為厲繇自也

○此刺淫亂之詩言匏未可用

繇

尚未可用為浮渡之器

而渡處方深行者當量其淺深而後可

渡以比男女之際亦當量度禮義而行也

輯錄范氏曰深則厲

淺則揭宜斟酌也若不顧禮義猶不度水之深淺而欲濟也

○有瀾

瀾爾反

濟盈有嘯

以小反

雉鳴濟盈不濡軌

居美反叶居有

反

雉鳴求其牡

比也瀾水滿貌嘯雌雉聲軌車轍也

車輪輾地處為輻

飛曰雌

雄走曰牡牡○夫濟盈必濡其轍雉鳴當求其雄比

常理也今濟盈而曰不濡軌雉鳴而反求其牡

輯錄竹房

張氏曰走曰牡牡此爾雅釋獸之正例諸家以牡雞雄狐為證言飛走通也殊不知詩人之意曰當濡其

轍今乃不濡其轍迹是大可怪也當求其雄令乃求其牡獸是大異常也如此歌之則得詩人之意知集傳之以比淫亂之人不度禮義非其配耦而犯禮以旨也

相求也

輯錄解頤曰禮有節文義有裁制禮其體也義其用也棄禮則必至於妄作違義則必至

於妄求此淫亂之人所以逆理犯分而不顧也○增釋吳師道曰此章盈鳴此句中有韻朱子謂之腰韻說見九罏公歸鴻飛下

○雖雖鳴鴈

叶魚反旭

許玉反日始旦士如歸妻迨冰未泮

賦也雖雖聲之和也鴈鳥名似鶩畏寒秋南春北旭

日初出貌昏禮納采用鴈

輯錄娶妻之禮以昏為期因名禮必以昏者取陽往

陰來之義也。納其采擇之禮，用鴈為摯者，取其順陰陽往來之義。六禮唯納徵用幣，餘皆用鴈。程子曰：取其不再，偶也。親迎以昏而納采，請期以旦歸，妻以冰泮。

而納采，請期，迨冰未泮之時。

輯錄注：納采，問名。納吉，納徵。請期，皆用所唯親。

迎用昏用所使者，用昏壻也。所謂冰泮，即仲春時也。

○言古人之於婚姻，其求

之不暴。

輯錄暴橫，猝也。急也。

而節之以禮如此，以深刺

去聲。淫亂。

之人也。

陳古義以刺今。此章可以當之。

○招招

照遙反。

舟子

叶獎里反。

人涉

五郎反。

否

叶補美反。

人涉

印須我友

叶羽軌反。

比也招招號

音毫

召之貌舟子舟人主濟渡者卽我也

○舟人招人以渡人皆從之而我獨否者待我友之招而後從之也以比男女必待其配耦而相從而刺此人之不然也

匏有苦葉四章章四句

一章言事適其可為宜二章言物反其常為恠

三章言古禮不可悖四章言非類不可從○增釋許氏曰此詩一章以水喻禮涉是徒步度

水之名水淺可涉則是合禮而可行者也水深險而不可涉則是非禮而不可行者也今濟處有深涉是不可涉者也况匏尚未可為浮渡之器乎以比非禮絕不可行之事是措

淫亂而言也然於可波處又當分擇深淺以
屬以揭比事有合禮可行而又須擇義謂雖
於禮可成男女之好又擇義而行之可也大
抵四句作兩截看深涉之深非深厲之深深
涉是水大深而不可涉者下面是水可涉而
又就其中度淺深而揭厲也二章正刺不度
禮義非其配偶犯禮相求濟盈不濡軌應一
章下兩句雉鳴求其牡應一章上兩句三章
言昏禮之正即深厲淺揭之意而濟盈不濡
軌之反四章言非類不可從是濟有深涉之意
而雉鳴求其牡之反

習習谷風以陰以雨
龜勉同心不宜有怒

叶暖五反

采芣

孚容

反采菲

反 妃鬼

無以下體德音莫違及爾同死

叶想止反

比也習習和舒也東風謂之谷風

輯錄毛氏曰陰陽和而谷風生

葍

蔓

音萬音菁

也菲似菑

音福

莖麓葉厚而長有毛下體根

也

輯錄釋文今菰菜也江南有菰江北有蔓菁相似而異菲菑類爾雅謂葍菜河內謂菰菜皆可食之

物也

葍菲根莖皆可食而其根則有時而美惡德音美

譽也

婦人為夫所棄故作此詩以叙其悲怨之情

言陰陽和而後雨澤降如夫婦和而後家道成故為

夫婦者當黽

輯錄黽勉也

勉以同心而不宜至於有怒又

言采葍菲者不可以其根之惡而棄其莖之美如為

夫婦者不可以其顏色之衰而棄其德音之善但德

音之不違則可以與爾同死矣

此章正言
夫婦之道

○行道遲遲中心有違不遠伊邇薄送我畿

音
誰謂荼

音
徒

苦其甘如薺

音
此

宴爾新昏如兄如弟

待禮
反

賦而比也遲遲舒行貌違相背也畿門內也荼苦菜

蓼屬也詳見良耜薺甘菜宴樂也新昏夫所更娶之

妻也○言我之被棄行於道路遲遲不進蓋其足欲

前而心有所不忍如相背然而故夫之送我乃不遠

而甚邇亦至其門內而止耳又言荼雖甚苦反甘如
薺以比已之見棄其苦有甚於荼而其夫方且宴樂
其新昏如兄如弟而不見恤蓋婦人從一而終今雖
見棄猶有望夫之情厚之至也

此章見棄之時不忍
絕意於夫而夫則絕

意於已也輯錄通釋曰此章上四句賦其望夫之意
而及其夫之薄情下四句則比已之甚苦而嘆其夫
樂之方

○涇以渭濁湜湜音殖其止音止宴爾新昏不我屑以毋逝

我梁母發我笱

古口反

我躬不閱遑恤我後

胡口反

比也涇渭二水名涇水出今原州百泉縣筭頭山東南至永興軍高陵入渭渭水出渭州渭源縣鳥鼠山

至同州馮翊縣入河

輯錄呂氏曰詩人多述土風以衛詩而遠引涇渭者蓋取其清

濁之意而比之耳○原州百泉縣今平涼府鎮原縣永興軍高陵今西安府高陵縣渭州渭源縣今平涼府渭源縣同州馮翊縣今西安府同州地並隸陝西

湜湜清貌汚水渚也屑潔

以與逝之也梁堰

音宴

石障水而空

音控

其中以通魚之

往來者也笥以竹為器而承梁之空以取魚者也閼容也○涇濁渭清然涇未屬渭之時雖濁而未甚見

由二水既合而清濁益分然其別出之渚流或稍緩
則猶有清處婦人以自比其容貌之衰久矣又以新
昏形之益見憔悴然其心則固猶有可取者但以故
夫之安於新昏故不以我為潔而與之耳又言母逝
我之梁母發我之笥以比欲戒新昏母居我之處母
行我之事而又自思我身且不見容何暇恤我已去
之後哉知不能禁而絕意之辭也

此章言己之容貌雖衰而德猶可取

者然夫既絕意於已則已無可索何矣在已且然况暇為新婚計哉輯錄輔氏曰不忍遂棄其家事者仁

也知其不能禁而
絕意焉者知也

○就其深矣方之舟之就其淺矣泳之游之何有何亡

鼃勉求之凡民有喪匍

音蒲匍

蒲北反

救

叶居尤反

之

興也方桴舟船也潜行曰泳浮水曰游

輯錄通釋曰泳與游今俗

所謂迷與涖也

匍匐手足並行急遽之甚也

輯錄說文曰匍手行也匍伏地

也

○婦人自陳其治家勤勞之事言我隨事盡其心

力而為之深則方舟淺則泳游不計其有與亡而勉

強以求之

人之濟水必量淺深我之治家不計有無謂以處事之道反相因為興可也但集傳

釋興體無此例疑興字當作比字而深則方舟之上
有如字輯錄孔氏曰隨水深淺期於必渡猶隨事難
易期於必成不問貧富吾皆盡力求之又周睦其隣里鄉黨莫不盡其

道也

此章則皆自許之
辭言其不當見棄

○不我能慙

許六反

反以我為讎既阻我德賈音古用不售

市救反叶
市周反

昔育恐育鞠

居六反

及爾顛覆

芳服反

既生既育

比予于毒

賦也慙養阻却鞠窮也○承上章言我於女家勤勞
如此而女既不我養而反以我為仇讎惟其心既拒

却我之善故雖勤勞如此而不見取如賈之不見售

也

輯錄說文售賣去手也

因念其昔時相與為生惟恐其生理

窮盡而及爾皆至於顛覆今既遂其生矣乃反比我

於毒而棄之乎張子曰育恐謂生於恐懼之中育鞠

謂生於困窮之際亦通

此章言故夫棄我之確然如此患難相保安樂相違可怨

也○谷風之婦人前以德音自許後以我德自許觀其經營於內周恤於外困窮不陷涉險而亨則其所自許者誠不為過矣輯錄李氏曰正所謂將恐將懼惟予與汝將安將樂汝轉棄予是也

○我有旨蓄

勅六反

亦以御

魚呂反下同

冬宴爾新昏以我御

窮有洸

音光

有潰

戶對反

既詒我肄

羊至反

不念昔者伊余來

堅

興也旨美蓄聚御當也洸武貌潰怒色也

輯錄項氏曰洸水涌

也其勇如水涌水之潰者其勢橫暴而四出故怒之盛者為潰

肄勞堅息也

(一) 又言

我之所以蓄聚美菜者蓋欲以禦冬月乏無之時至

於春夏則不食之矣今君子安於新昏而厭棄我是

但使我禦其窮苦之時至於安樂則棄之也

物可棄陳而取

新夫婦不可圖新而厭舊也此以處置事理不同為興

又言於我極其武怒而

盡遺我以勤勞之事曾不念昔者我之來息時也追

言其始見君子之時接禮之厚怨之深也

初以安逸與我後以

勤勞遺我何終始之不相似也○此章又承上章之意而怨其有始無卒也

谷風六章章八句

輯錄朱子曰看詩義理外更好看他文章且如谷風他只

是如此說出來然而序得事曲折先後皆有次序而今費盡氣力去做後尚做得不好輔氏曰觀此一詩比物連類因事興詞條理秩然有序勤而不怨怨而不怒玩而味之可謂賢婦人矣而見棄於夫者亦獨何哉解頤曰谷風雖棄婦所作而觀其自叙有治家之勤有睦隣之善有安貧之志有周急之義皆其節之可取者也至於見棄矣而拳拳忠厚之

意猶藹然溢於言辭之表則是初無可棄之罪也徒以其夫之安於新昏不以為潔而棄之耳然其言之有序而不迫如此殆庶幾乎夫子所謂可與怨者矣

式微式微胡不歸微君之故胡為乎中露

賦也式發語辭微猶衰也再言之者言衰之甚也

輯錄

范氏曰諸侯失國而寄於他國之邑微莫甚焉故郭璞註云言至微也

微猶非也中露

露中也言有露濡之辱而無所庇覆

音阜

也○舊說以

為黎侯失國而寓於衛

輯錄鄭氏曰寓寄也黎侯為狄人所逐棄其國而寄於衛

○增釋鄆陽張氏曰黎氏故國或云黎山氏國子諸侯爵即西伯所戡者與紂都接今潞州東十八里有

故黎侯城
有黎亭

其臣勸之曰衰微甚矣何不歸哉我若非

以君之故則亦胡為而辱於此哉

增釋許氏曰此詩兩章上二句勸歸

之辭下二句怨辭也晏子曰君為社稷死則死之為社稷亡則亡之若為己死己亡非其私暱誰敢任之今曰微君之故又曰微君之躬以黎侯有為己亡之意蓋黎侯必有不君致亂之階而召狄故其謂所以濡於中露陷於泥中者為君之躬故耳否則主危臣憂主辱臣死又何有胡為乎之怨乎

○式微式微胡不歸微君之躬胡為乎泥中

賦也泥中言有陷溺之難而不見拯救也

式微二章章四句

泥中之禍甚於中露之辱

此無所考姑從序說

衛有他國之詩六篇式微苑丘河廣作於衛者

也載馳泉水竹竿為衛而作者也作於衛者衛國之所錄為衛而作者衛國之所傳况黎

許國小宋無風泉水竹竿不知出何國列於衛何怪乎

旄丘之葛

叶居謁反

兮何誕

徒旱反

之節兮叔兮伯

叶音逼

兮何

多日也

興也前高後下曰旄丘誕闊也叔伯衛之諸臣也○

舊說黎之臣子自言久寓於衛時物變矣故登旄丘之上見其葛長大而節踈闊因託以起興曰旄丘之

葛何其節之闕也衛之諸臣何其多日而不見救也

因所見則若偶然者但節之踈闊日之久遠義亦相因故用其語相呼而為興此詩本責衛

君而但斥其臣可見其優柔而不迫也

輯錄輔氏曰本責衛君而

但斥其臣望之雖切而其辭益緩真可見其溫柔寬厚之情也

○何其處也必有與也何其久也

叶舉里反

也必有以也

賦也處安處也與與國也

與猶黨與也相與和好之國曰與國

以他故

也○因上章何多日也而言何其安處而不來意必

有與國相俟而俱來耳又言何其久而不來意其或

有他故而不得來耳詩之曲盡人情如此

○狐裘蒙戎匪車不東叔兮伯兮靡所與同

賦也大夫狐蒼裘蒙戎亂貌言弊也○又自言客久

而裘弊矣豈我之車不東告於女乎但叔兮伯兮不

與我同心雖往告之而不肯來耳至是始微諷切之

或曰狐裘蒙戎指衛大夫而譏其憤音會亂之意匪車

不東言非其車不肯東來救我也但其人不肯與俱

來耳

其人大夫所與之人也

今按黎國在衛西前說近是

黎國注見

前式微

章下

○瑣

素果反

兮尾兮流離之子

叶獎里反

叔兮伯兮褻

由救反

如

充耳

賦也瑣細尾末也流離漂散也褻多笑貌充耳塞耳也耳聾之人恒多笑○言黎之君臣流離瑣尾若此其可憐也而衛之諸臣褻然如塞耳而無聞何哉至是然後盡其詞焉流離患難之餘而其言之有序而不迫如此其人亦可知矣

旄丘四章章四句

一章惟之二章疑之三章微諷之四章直責之

說同上篇

式微處困而思奮旄丘責人而不刻可謂賢矣

簡兮簡兮方將萬舞日之方中在前上處

賦也簡簡易不恭之意萬者舞之總名

輯錄何休云舞謂之萬者

象武王以萬人定天下民樂之故名之商頌亦曰萬舞有奕殷亦以武定天下

武用干戚文

用羽籥也

輯錄呂氏曰萬舞二舞之總名干舞者武舞之別名籥舞者文舞之別名也文舞又

謂之羽舞又疏言干則有戚禮記朱干玉戚冕而舞大武言籥則有羽籥師教國子舞羽吹籥又禮書干盾也以革為之其背曰瓦設錫朱質而繪以龍龍之外又繪以雜羽其繁之也以繡韋其屬繡韋以紛戚

斧也玉戚以玉飾其柄柯長三尺博三寸厚一寸有半五分其長以其一為之首錫音陽白金也紛音分如緩又樂書羽舞者翟羽可用為儀執以之以所以為蔽翼者也日之方中在前上

處言當明顯之處○賢者不得志而仕於伶官

輯錄鄭氏

曰伶氏世掌樂官而善焉故後世號樂官為伶官

有輕世肆志之心焉故其

言如此若自譽而實自嘲也

輯錄輔氏曰此章既自以為簡易次章又自以

為碩人只此便可見其為不恭也當明顯之處公然為此而不以為辱亦是不恭之意與此章所謂公庭萬舞同先生謂其若自譽而實自嘲者深得其旨也

○碩人俛俛

疑矩反

公庭萬舞有力如虎執轡如組

音祖

賦也碩大也俚俚大貌轡今之韁也組織絲為之言

其柔也御能使馬則轡柔如組矣

人馬皆從容不急迫故轡柔如此

○又自譽其才之無所不備亦上章之意也

○左手執籥

余若反

右手秉翟

寧歷反叶直角反

赫如渥

於角反

赭

音者叶
陟畧反

公言錫爵

賦也執籥秉翟者文舞也籥如笛而六孔或曰三孔

翟雉羽也赫赤貌渥厚漬也赭赤色也言其顏色之

充盛也公言錫爵即儀禮燕飲而獻工之禮也

工告樂備

主人獻工所以勞之也輯錄燕禮主人洗升獻工工不興左瑟一人拜受爵主人西階上拜送爵又鄉飲酒鄉射大射儀以碩人而得此則亦辱矣乃反以其皆有獻工之禮

賚予

音與

之親洽為榮而誇美之亦玩世不恭之意也

輯錄玩戲也弄也輔氏曰意唯輕之是以玩之志唯肆焉故不恭也

○山有榛

側巾反

隰有苓

音苓

云誰之思西方美人彼美人

兮西方之人兮

興也榛似栗而小下濕曰隰苓一名大苦葉似地黃

即今甘草也

輯錄爾雅曰藟大苦諸本作大葉誤也葉字上下無所屬當為衍文昭武黃氏

曰甘而言苦者古人語倒

西方美人託言以指西周之盛王如離

騷亦以美人目其君也

以彼所有之物興此所無有之人輯錄目猶稱也

又

曰西方之人者歎其遠而不得見之辭也○賢者不

得志於衰世之下國而思盛際之顯王故其言如此

而意遠矣

此章乃見不恭之情實夫其所思者在西方之美人則當世人君無有可其意者故

玩之如此

簡兮四章三章章四句一章六句

一章自譽其位處二章自

譽其才備三章自譽其勞寵四章乃言其情實而有爵爵之意焉

舊三章章六句今改定○張子曰為祿仕而

抱關擊柝

輯錄音託夜行所擊木也

則猶恭其職也為伶

官則雜於侏儒俳優之間

輯錄侏儒短人也俳音排戲也優倡

也漢書談笑類俳倡

不恭甚矣其得謂之賢者雖其迹

如此而其中固有以過人又能卷而懷之是

亦可以為賢矣東方朔似之

輯錄許氏曰侏儒俳優蓋亦衰

世用之非樂中所常用者今按儀禮中之歌詩用樂則侏儒俳優誠無所用竊恐許氏之說或有補於張子之意也姑存之

悲

悲位反

彼泉水亦流于淇有懷于衛靡日不思

叶新反

變

力轉反

彼諸姬聊與之謀

叶謨悲反

興也悲泉始出之貌泉水即今衛州共

音恭

城之百泉

也淇水出相

去聲

州林慮

音閤

縣

輯錄

相州

林慮縣今

東

河南彰德府林慮縣

東

今

東

流泉水自西北而東南來注之變好貌諸姬謂姪娣

也○衛女嫁於諸侯父母終思歸寧而不得故作此

詩言悲然之泉水亦流于淇矣我之有懷于衛則亦

無日而不思矣

泉水流淇不易其地女心思衛不忘其慮彼此皆有定向也故以為興

是以即諸姬而與之謀為歸衛之計如下兩章之云

也

輯錄輔氏曰讀首章四句便可見其思歸之心凡人之情營私背公故不詢謀惟恐人之或知也衛

女思歸博謀於諸姬而無所隱則其情之正大可知矣

○出宿于涉

子禮反

飲餞

踐音

于禰

乃禮反

女子有行遠

于萬反

父母兄弟

待禮反

問我諸姑遂及伯姊

叶獎禮反

賦也涉地名飲餞者古之行者必有祖道之祭祭畢

處者送之飲於其側而後行也

輯錄禮記曾子問曰道而出陳氏曰祖祭

道神而後出行也孔氏曰此無言出宿者見飲餞為出宿而設也

禰亦地名皆自衛

來時所經之處也諸姑伯姊即所謂諸姬也○言始

嫁來時則固已遠其父母兄弟矣

此篇之旨
在遠父母兄弟二句
竹竿

亦然

況今父母既終而復可歸哉是以問於諸姑伯姊

而謀其可否云耳鄭氏曰國君夫人父母在則歸寧

沒則使大夫寧於兄弟

○出宿于干

叶居焉反

飲餞于言載脂載牽

胡瞎反叶下介反

還

音旋

車言邁邁

市專反

臻于衛

此字本與邁害叶今讀誤

不瑕有害

賦也干言地名適衛所經之地也脂以脂膏塗其牽

使滑澤也牽車軸也不駕則脫之設之而後行也

輯錄

牽與輶同車軸頭鐵也

還回旋也旋其嫁來之車也遄疾臻至

也瑕何古音相近通用○言如是則其至衛疾矣然

豈不害於義理乎疑之而不敢遂之辭也

此章出宿飲餞與上

章不同上章是嫁來之時如此此章是旋反於衛則如此

○我思肥泉茲之永歎

叶宅消反

思須與漕

叶沮侯反

我心悠悠

駕言出遊以寫我憂

賦也肥泉水名

輯錄爾雅歸異出同肥注引毛傳曰所出同所歸異也集傳不取只云水

名須漕衛邑也悠悠思之長也寫除也

輯錄嚴氏曰寫者傾而除

之

○既不敢歸然其思衛地不能忘也安得出游於

彼而寫其憂哉

輯錄問此只是因思歸不得故欲出遊于國以寫其憂否朱子曰夫人之

遊亦不可輕出只是思遊於彼地耳輔氏曰思歸寧者思之正也謀及姪姊謀之正也恐害義理而卒於不歸事之正也始終一出於正雖賢士且難之况婦人乎

泉水四章章六句

一章思歸而欲與決其疑二章三章致問而得與決其疑

四章則疑已決而不忘也

楊氏曰衛女思歸發乎情也其卒也不歸止

乎禮義也聖人著之於經以示後世使知適

異國者父母終無歸寧之義則能自克者知

所處矣

輯錄朱子曰觀楊氏之說則知聖人以詩為教之意深矣

出自北門

叶眉貧反

憂心殷殷終窶

其矩反

且貧莫知我艱

叶居

銀反

已焉哉

叶將其反下同

天實為之謂之何哉

比也北門背陽向陰

陽明陰暗北門所以喻昏亂之朝也

殷殷憂也窶

者貧而無以為禮也

有大夫士之位斯有大夫士之禮祿不稱位則無以為禮矣輯

錄李氏曰衛臣終窶且貧不見知於君也非專較廩祿之厚薄也

○衛之賢者處亂

世事暗君不得其志故因出北門而賦以自比

輯錄問只

作賦說如何朱子曰當作賦而比當時必欲出北門而後作此詩亦有比意思

又歎其貧窶

人莫知之而歸之於天也

輯錄輔氏曰終者已焉之辭蓋自以為無復有望也

故歎之曰已焉哉天實為之謂之何哉此蓋知其無可奈何而歸之於天也是亦所謂發乎情止乎禮義

也者

○王事適我政事一埤

避支反

益我我入自外室人交徧

適

知革反叶竹棘反

我已焉哉天實為之謂之何哉

賦也王事王命使為之事也適之也

輯錄適之皆至也

政事

其國之政事也

天子所命則主事也

一猶皆也。埤厚室家適責

也。○王事既適我矣。政事又一切以埤益我。其勞如

此而窶貧又甚。室人至無以自安。而交徧適我。則其

困於內外極矣。

輯錄范氏曰。關雎之化行。則婦人能閱其君子。至於衰世。則室家日見而

有不知其心者。○增釋許氏曰。外不見知於君。而不得行其志。內為窶貧之故。而有室人之適。困於內外極矣。乃一歸之於天。非知命樂義之君子。能如是乎。

○王事敦

叶都反

我政事一埤遺

唯季反叶夷回反

我我入自外

室人交徧摧

徂回反

我已焉哉。天實為之。謂之何哉。

賦也敦猶投擲也遺加摧沮也

北門三章章七句

前一章數其貧窶而安於命後二章嘆其貧窶勞苦而安

命於

楊氏曰忠信重祿所以勸士也衛之忠臣至於窶貧而莫知其艱則無勸士之道矣仕之所以不得志也先王視臣如手足豈有以事投遺之而不知其艱哉然不擇事而安之無懟憾之辭

輯錄莊子人間世云夫事其君者不擇事而安之忠之盛也

知

其無可柰何而歸之於天所以為忠臣也

輯錄

輔氏曰楊氏之說其論君臣之道備矣而衛之忠臣則處其變而不失其道者可以為萬

世臣子之法也

北風其涼雨

于付反

雪其雱

普康反

惠而好

呼報反

我攜手

同行

叶戶郎反

其虛其邪

音徐下同

既亟只

音紙下同

且

子餘反下同

比也北風寒涼之風也涼寒氣也雱雪盛貌惠愛行

去也虛寬貌邪一作徐緩也亟急也只且語助辭○

言北風雨雪以北國家危亂將至而氣象愁慘也故

欲與其相好之人去而避之且曰是尚可以寬徐乎
彼其禍亂之迫已甚而去不可不速矣

○北風其喈

音皆叶
居奚反

雨雪其霏

芳非反

惠而好我攜手同

歸其虛其邪既亟只且

比也喈疾聲也霏雨雪分散之狀

輯錄謝氏曰北風
怒而有聲不止於

涼矣雨雪霏霏而密不止
於霽矣喻禍害愈急也

歸者去而不反之辭也

○莫赤匪狐莫黑匪烏惠而好我攜手同車其虛其邪
既亟只且

比也狐獸名似犬黃赤色烏鴉黑色皆不祥之物人

所惡見者也所見無非此物

輯錄無非訓莫匪字

則國將危亂

可知

不良之人不善之政不美之俗皆不祥而可惡者也增釋此章則見國將危亂而氣象愁慘猶

若惡見其不祥之物也

同行同歸猶賤者也同車則貴者亦去

矣

勢已漸而迫輯錄謝氏曰謂一節急一節風人之法度也

北風三章章六句

同行則去危同歸則就安同車則二者之意兼之矣北

門之處困忠臣也北風之去亂智者也又北風與魏風十畝之間相似然彼則其意舒其辭緩猶之可也此則危迫已甚明夷之飛將垂其翼矣

靜女其姝

赤朱反

俟我於城隅愛而不見搔

蘇刀反

首踟

直知

反

踟

直誅反

賦也靜者閒雅之意姝美色也

輯錄此淫奔者自相稱美之詞非真閒雅

也

城隅幽僻之處不見者期而不至也踟躕猶躑躅

也

輯錄踟躕行不進貌躑躅跳貌

此淫奔期會之詩也

○靜女其嬈貽我彤

徒冬反

管

叶古充反

彤管有煒

于鬼反

說

悅音

懌

音亦

女美

賦也嬈好貌於是則見之矣彤管未詳何物蓋相贈

以結殷勤之意耳

輯錄殷勤委曲貌

煒赤貌言既得此物而

又悅懌此女之美也

○自牧歸荑

徒兮徒計二反

洵美且異

夷戎二音

匪女

音汝

之為美美

人之貽

與異同

賦也牧外野也

輯錄郊外謂之牧牧外謂之野

歸亦貽也荑茅之始

生者洵信也女指荑而言也○言靜女又贈我以美

而其荑亦美且異然非此荑之為美特以美人之所

贈故其物亦美耳

輯錄許氏曰首言城隅末言自牧蓋不特逐於城隅抑且相逐於野

靜女三章章四句

一章未見之時二章齊會之時三章既會而歸之時

新臺有泚

此禮反

河水瀰瀰

莫過反

燕婉之求

渠音

籊不

鮮

斯淺反叶想止反

賦也泚鮮明也瀰瀰盛也燕安婉順也籊籊不能俯

疾之醜者也蓋籊籊本竹席之名人或編以為困其

狀如人之擁腫而不能俯者故又因以名此疾也鮮

少也

籊籊不鮮猶曰擁腫之病也

○舊說以為衛宣公為其子伋

娶於齊而聞其美欲自娶之乃作新臺於河上而要

音之輯錄孔疏云此時伋妻蓋自齊始來未至於衛
腰公於河上作臺以待其至李氏曰新臺臨河今

澶州遺址尚存國人惡之而作此詩以刺之言齊女本求與

伋為燕婉之好而反得宣公醜惡之人也

○新臺有洒

七罪反叶
先典反

河水浼浼

每罪反叶
美辨反

燕婉之求

蘧篚不殄

賦也洒高峻也

輯錄臺在河上曰泚曰洒皆從水義
泚謂水中臺影鮮明之貌洒謂水光

之中見其臺
之高峻也

浼浼平也殄絕也言其病不已也

○魚網之設鴻則離之燕婉之求得此戚施

興也鴻鴈之大者離麗也戚施不能仰亦醜疾也

錄輯

謝氏曰籛條戚施之疾宣公非有此疾國人惡其無禮義亂人倫故以醜惡之疾比之既無人道亦非人

也形○言設魚網而反得鴻以興求燕婉而反得醜疾

之人所得非所求也

麗平聲歷也○此以所得非所求為興

新臺三章章四句

不鮮已甚不已尤甚既不鮮又不能仰則尤為甚

凡宣姜事首末見春秋傳然於詩則皆未有

考也諸篇放此

衛風美者多淫詩少本不當與鄭比也然新臺牆茨之惡

又國風中無所有故論淫詩必以鄭衛並稱蓋鄭舉其全衛舉其重輯錄諸篇曰諸者牆

有茨君子偕老
鷄之奔奔是也

二子乘舟汎汎

芳劍反

其景

叶舉兩反

願言思子中心養養

兩以

反

賦也二子謂伋壽也乘舟渡河如齊也景古影字養
養猶漾漾憂不知所定之貌○舊說以為宣公納伋
之妻是為宣姜生壽及朔朔與宣姜媾伋於公公令
伋之齊使賊先待於隘而殺之壽知之以告伋伋曰
君命也不可以逃壽竊其節而先往

輯錄左傳曰及
行飲以酒壽子

載其旌以先

賊殺之。及至曰：君命殺我，壽有何罪？賊又殺

之。國人傷之，而作是詩也。

增釋鄱陽張氏曰：此章言

齊其影汎汎然，何所歸乎？為其將見殺，顧其影而憐之也。我念而思之，中心養養，然憂不知所定也。

○二子乘舟，汎汎其逝。

此字本與害叶，今讀誤。

願言思子，不瑕有

害。

賦也。逝，往也。不瑕，疑辭。義見泉水。此則見其不歸而

疑之也。

增釋鄱陽張氏曰：此章言二子汎汎然從此逝矣，痛其往而不返也。詩人深求其心之無

它而怨之曰：不為何過而有害也。

二子乘舟二章章四句

一章屢其被害
二章疑其被害

太史公曰余讀世家言至於宣公之子以婦
見誅弟壽爭死以相讓此與晉太子申生不
敢明驪姬之過同俱惡傷父之志然卒死亡
何其悲也或父子相殺兄弟相戮亦獨何哉

小杖則受大杖則逃走
伐壽之死未盡善也
然伐寧被殺而不忍違其父
壽寧代死而不忍死其兄則其志有可哀者
聖人於此亦閔其不幸而不忍刪去之
集傳引此以見孔子錄之之故也
輯錄輔氏曰二子處此亦不得為是而夫子取此詩者所以著宣公志行之


惡而其禍至於如是之酷以為萬世戒爾故
先生嘗謂太史公欠此意然其言有抑揚可
以感發人故取之非便以二子所處為是也
解頤曰宣公納子之妻以為妾則夫婦之倫
滅矣因宣姜而殺二子則父子之倫滅矣夫
而不夫父而不父則君之道以之不立而君
臣之倫亦廢矣春秋以來三綱廢九法斁未
有甚於此時者以其卒胥為夷也宜哉○增釋
都陽張氏曰詩緝衛自宣公殺伋壽以朔為
世子代立是為惠公左右公子怨朔之讒殺
伋乃作亂立黔牟惠公奔齊其後諸侯納惠
公黔牟奔周惠公怨周之容黔牟與燕伐周
立子頹為王惠王奔溫及惠公卒子懿公立
百姓大臣猶以殺伋之故皆不服狄乘其釁
殺懿公而滅衛嗚呼衛之亂極矣父子兄弟
君臣之間相戕相賊不唯流毒子孫啟侮夷

狄以之殺身亡國其餘殃所漸且稔王室之禍蓋綱常道盡天地幾於傾陷矣推原亂根始於夫婦之不正衽席之禍一至此邪以是知詩首關雎聖人之意深遠矣哉

邶十九篇七十二章三百六十三句

輯錄通釋曰衛

三十九篇而邶風才十有九然觀綠衣則妾僭嫡矣燕燕則臣弑君矣谷風則夫婦之道乖新臺則男女之倫滅二子乘舟則父子之恩絕旄丘則無恤隣之義簡兮則無尊賢之心北門則失勸士之道亂常敗政莫甚於此所以居變風之首歟於呼渡河野處已兆矣不待讀定之方中而后知也



詩經疏義會通卷二

欽定四庫全書

經部

詩經疏義會通卷三

詳校官監察御史臣施朝幹

通政使司副使臣莫瞻菴覆勘

總校官編修臣倉聖脉

校對官典簿臣劉景岳

謄錄監生臣胡浚

欽定四庫全書

詩經疏義會通卷三

元 朱公遷 撰

鄘一之四

說見上篇

汎彼柏舟在彼中河

徒坎反

彼兩髦

音毛

實維我儀

叶牛何反

之死矢靡他

湯河反

母也

天叶

只

音紙下同

不諒人只

興也中河中於河也髮髮垂貌兩髦者翦髮夾凶

音信

廣韻注曰頭會腦蓋也

子事父母之飾親死然後去之

輯錄昭武黃氏

曰禮記內則拂髦注用髮為之象幼時鬢鬢注所遺
髮也謂留髮為角子者也喪大記脫髦注幼時剪髮
為之年長垂著兩邊髦然也明人之至親惟有孺子
之義父死脫左髦母死脫右髦親沒不髦孔氏諸侯
小斂脫髦士此蓋指共伯也我共姜自我也輯錄共
伯名餘
既殯脫髦共謚伯字婦人
儀匹之至矢誓靡無也只語助辭諒

信也○舊說以為衛世子共伯蚤死共伯釐侯
子武公兄其妻

共姜守義父母欲奪而嫁之輯錄奪者欲奪
其守義之志也故共姜

作此以自誓言柏舟則在彼中河兩髦則實我之匹

雖至於死誓無他心舟在中河而無他適之地我配
兩髦而無他適之心物有定所

人有定志而用彼我二字相呼應也母之於我覆育之恩如天罔極而

何其不諒我之心乎不及父者疑時獨母在或非父

意耳

莊姜盡禮無懟心共姜守義無二志故二柏舟為邶鄘之首又共姜當釐侯時釐侯去康叔九

世耳其子為武公其孫為莊公變始於二姜時也次第亦當然也輯錄輔氏曰實維我匹一定而決不可易也之死矢靡他雖死而誓不敢易也夫母之欲嫁共姜想亦不過是惑於愛而慮其終耳今味共姜自誓之言其至誠貞固之意如此則母之惑可解而慮可釋矣

○汎汎柏舟在彼河側髣彼兩髦實維我特之死矢靡

慝

他得反

母也天只不諒人只

興也特亦匹也

輯錄朱子曰特有孤特之義而以爲匹者古人用字多如此猶治之爲亂

也 慝邪也以是爲慝則其絕之甚矣

增釋張氏曰他

匿於心者也他適而誓之死靡爲之其事猶顯至於一念邪思之微亦誓之死而靡發可見其心之貞固

而節不渝矣

柏舟二章章七句

自誓之意以漸而深輯錄真氏曰柏舟之不再適蓋婦人

之大節故孔子列之使萬世取法焉程子之謂餓死事極小失節事極大可爲後世深戒陳定宇曰衛之淫風流行而有共姜特立之節真可以遏人欲之橫流矣讀此詩者豈不可以感發人之善心乎解頤曰女子之生以身事人一與之齊終身不改古之制也共姜

之守義裁以古制雖婦道之當然耳斯可見人心天理之未嘗泯也亦豈不足以挽風俗

之衰扶綱常之重則其置之廊風之首亦宜矣

牆有茨不可埽

叶蘇后反

也中葍

古候反

之言不可道

叶徒厚反

也

所可道也言之醜也

興也茨蒺藜也蔓生細葉子有三角刺人

輯錄埤雅蒺藜布也

蔓生子有三角刺人狀如菱而小一名茨

中葍謂舍之交積材木也

輯錄中葍

之言若曰閨閫之言也

道言醜惡也○舊說以為宣公卒惠公

幼其庶兄頑烝於宣姜

輯錄左傳閔公二年昭伯烝宣姜生齊子戴公父公宋桓

許穆夫人注惠公朔蓋年十五六昭伯即故詩人作公子頑宣公之長庶伋之兄也上淫曰烝

此詩以刺之言其閨中之事皆醜惡而不可言理或

然也

牆茨芒刺不可埽內言醜惡不可道是皆無所施其惡惡之心者而用語勢相呼應也

○牆有茨不可襄也中藹之言不可詳也所可詳也言之長也

興也襄除也詳詳言之也言之長者不欲言而託以語長難竟也

○牆有茨不可束也中藹之言不可讀也所可讀也言

之辱也

興也束束而去之也讀誦言也辱猶醜也

輯錄輔氏曰辱深於

醜

牆有茨三章章六句

反覆譏刺

楊氏曰公子頑通乎君母閨中之言至不可

讀其汙甚矣聖人何取焉而著之於經也蓋

自古淫亂之君自以為密於閨門之中世無

得而知者故自肆而不反聖人所以著之於

經使後世為惡者知雖閨中之言亦無隱而

不彰也其為訓戒深矣

輯錄輔氏曰楊氏之說蓋不獨為此篇發

凡聖人所錄淫亂之詩其意皆如此即先生所謂惡者可以懲創人之逸志者也解頤曰

宣姜本伋之妻也一失身於宣公而為新臺之有泚再失身於公子頑而為中冓之不可

道蓋由其節義虧缺於前是以無所顧藉於後甘以其身處於污穢而不辭則亦無復羞

愧悔悟之萌矣

君子偕老副笄六珈

音加叶居河反委委於危

佗佗

待河如山反

如河象服是宜

叶牛反子之不淑云如之何

賦也君子夫也偕老言偕生而偕死也女子之生以
身事人則當與之同生與之同死故夫死稱未亡人

言亦待死而已不當復有他適之志也副祭服之首

飾編

一篇上聲
如字

髮為之

列他髮為之假作紒形
加於首上為飾紒音計

筭衡筭

也

輯錄衡筭以玉為
之即今之簪也

垂於副之兩旁當耳其下以紃

懸璜

紃都感反織
五采為之

加之言加也以玉加於筭而為飾

也

輯錄孔氏曰必飾
之有六飾之盛也

委委佗佗雍容自得之貌如山

安重也如河弘廣也

此二句主
德容言

象服法度之服也淑

善也○言夫人當與君子偕老故其服飾之盛如此

而雍容自得安重寬廣又有以宜其象服既為夫人則當如此

今宣姜之不善乃如此雖有是服亦將如之何哉言

不稱也

此章言服飾之盛而德不相稱為可責○增釋鄒陽張氏曰此章三截上二句言夫人能

與君子偕老則得有副笄之服既服此宜從一而偕老中三句正言宣姜威儀容貌稱其象服下二句言今乃不善將云何哉中三句應副笄六珈下二句應君子偕老責之也

○玼音此兮玼兮其之翟音去也鬢音軫髮如雲不屑先結反

從帝反也王之瑱吐殿反也象之晞勅帝反也楊且子餘反之

皙星歷反叶也胡然而天也胡然而帝也

賦也玼鮮盛貌翟衣祭服刻繒為翟雉之形而彩畫

之以為飾也

刻繒為之形而彩畫之綴於衣以為文章輯錄翟即揄狄見天官內司服翟狄

同又見何彼穠矣小序疏義鄭箋侯伯夫人之服自揄翟而下如王后鬢黑也如雲言

多而美也屑潔也鬢音被鬢也人少髮則以鬢益之

髮自美則不潔於鬢而用之也瑱塞耳也

以玉係於統而當耳

象象骨也攄所以摘髮也

摘音剔蓋若今之篦子然揚眉上廣也

眉下而盛則醜惡故以上廣為美

且助語辭皙白也胡然而天胡然

而帝言其服飾容貌之美見者驚猶鬼神也

此章言服飾容

貌之盛若可疑而又可畏輯錄輔氏曰其者指宣姜而言玼兮玼兮其之翟也言服之美也鬢髮如雲不

屑鬢也言質之美也足乎已者無待於外也王之瑱也象之栳也言飾之美也揚且之哲也言色之美也

服飾容貌之美盛如天如帝然是豈可以徒居哉○增釋鄱陽張氏曰此章末二句謂夫人容貌之美服

飾之盛如此胡然而自天降此乎胡然而鬼神來此乎此則問辭

○璫七我反兮璫兮其之展

涉戰反叶

也蒙彼綯側救反絺

是紕息列反袞薄慢反叶

也子之清揚揚且之顏堅叶魚反也

展如之人兮邦之媛音院也

賦也璫亦鮮盛貌展衣也以禮見音現於君及見賓客

之服也

輯錄毛氏曰展衣以丹縠為衣鄭氏曰展衣宜白禮記作檀音戰

蒙覆音阜也

縞絺絺之威感者當暑之服也

輯錄孔氏曰葛之精者曰絺其精尤細靡

者縞也言細而縷縞

紕袷束縛意以展衣裳絺綌而為之紕袷

所以自斂飭

音勅

也或曰蒙謂加絺綌於褻衣之上所

謂表而出之也

輯錄朱子曰先著裏衣表絺綌而出之於外欲其不見體也

清視

清明也揚眉上廣也顏額角豐滿也展誠也美女曰

媛見其徒有美色而無人君之德也

此章言服飾容貌之威若可喜

而實可惜也。○增釋鄱陽張氏曰：此章末則荅之曰：此邦之媛也，惜之也。

君子偕老三章一章七句一章九句一章八句

東萊呂氏曰：首章之末云子之不淑，云如之

何，責之也。二章之末云胡然而天也，胡然而

帝也，問之也。三章之末云展如之人兮，邦之

媛也，惜之也。辭益婉而意益深矣。

州錄輔氏曰：凡人之

責人辭愈多，則氣愈恭，氣愈恭則辭愈厲。此則志不帥氣而氣反動其志者也。君子之貞人則辭愈多而氣愈緩，氣愈緩而辭愈和。此則發乎情止乎禮義也。且心有所忿懣則不

得其正如此詩之辭益婉而意益深則心不
至於失其正矣東萊先生責之問之惜之三

字說盡詩意
極好玩味

爰采唐矣沫音妹之鄉矣云誰之思美孟姜矣期我乎桑

中叶諸良反要於遙反我乎上宮叶居王反送我乎淇之上叶辰羊反矣

賦也唐蒙菜也一名兔絲輯錄圖經釋曰唐也蒙也女難也兔絲也一物四名

本草夏生苗如絲蔓延木上生實如蠶子本經并以唐蒙為一名許氏曰唐蒙非可食之物不知何以為

菜沫衛邑也書所謂妹邦者也輯錄孔氏曰酒誥注妹邦紂所都朝歌即

沫也言姜齊女貴族桑中上宮淇上又沫鄉之中小地名也

要猶迎也○衛俗淫亂世族在位相竊妻妾故此人
自言將采唐於沫而與其所思之人相期會迎送如
此也

○爰采麥叶訖反矣沫之北矣云誰之思美孟弋矣期我

乎桑中要我乎上宮送我乎淇之上矣

賦也麥穀名秋種夏熟者輯錄白虎通曰麥金也
金旺而生火旺而死弋

春秋或作姒盖杞女夏后氏之後亦貴族也

○爰采葑矣沫之東矣云誰之思美孟庸矣期我乎桑

中要我乎上宮送我乎淇之上矣

賦也葑蔓菁也庸未聞疑亦貴族也

輯錄劉執中曰采唐麥對者欲

適幽遠行其淫亂不敢正名而託以采此也許氏曰大率言貴族以誦女之美未必真有姜弋庸三姓之也女

桑中三章章七句

樂記曰鄭衛之音亂世之音也比也

同於慢矣

五音宮為君商為臣角為民徵為事羽為物五者皆亂迭相凌謂之慢而國滅亡比於慢者亂而迭於亡也
桑間濮上之音亡國之音也其政

散其民流誣上行私而不可止也

流者音之蕩也聞此

濮上之音則知政無統紀民無維係按桑間誣其君上以行私情而不可禁止也

即此篇故小序亦用樂記之語

輯錄鄭氏曰濮水之上地

有桑間者亡國之音於此水出也昔殷紂使師延作靡靡之樂已而因沉於濮水後師涓過焉夜聞而寫之為晉平公鼓之是之謂也通釋曰朱子以桑間即此桑中詩而証以樂記之語然則鄭氏謂師涓所聞者自是濮上之音也

鶉

純音

之奔奔鵲之疆疆

音姜人之無良我以為兄

叶王反

興也鶉鶉

音屬

輯錄埤雅鶉有兩種有丹鶉白鶉上禿下夏出秋藏飛必附草鶉能不

亂其匹鵲能奔奔疆疆居有常匹飛則相隨之貌人不淫其匹

謂公子頑良善也○衛人刺宣姜與頑非匹耦而相

從也故為惠公之言以刺之曰人之無良鵲鵲之不

若而我反以為兄何哉

物有定偶人不如物故以為
輿輯錄孔氏曰言鵲則鵲自

相隨奔奔然鵲則鵲自相隨疆疆然各有常匹不亂其類今宣姜為母頑則為子而與之淫亂曾鵲鵲之

不如而我反以為兄也哉

○鵲之疆疆鵲之奔奔

叶通
珉反

人之無良我以為君

興也人謂宣姜君小君也

輯錄輔氏曰詩人疾惡宣姜至矣而又不取不以為

小君也彼謂狡童碩鼠為稱其君者何哉

鶉之奔奔二章章四句

一章刺頑一章刺姜

范氏曰宣姜之惡不可勝道也國人疾而刺之或遠言焉或切言焉遠言之者君子偕老是也切言之者鶉之奔奔是也衛詩至此而人道盡天理滅矣其事為人所不忍言人類無以異於禽獸而國隨以亡矣胡氏曰楊時有言詩載此篇以見衛為狄所滅之因也故

在定之方中之前

輯錄彭氏曰陳氏云木必壞然後蟲生焉國必亂然

後寇生焉聖人存此詩以為狄入衛張本使後世知所戒也

因以是說考

於歷代凡淫亂者未有不至於殺身敗國而

亡其家者然後知古詩垂戒之大而近世有

獻議乞於經筵不以國風進講者殊失聖經

之旨矣

宋仁宗時講官不欲講新臺仁宗以謂聖人刪詩義勸戒不當有過輯錄

李氏曰淫亂非美事而不刪之者所以示鑒戒也亦如春秋亂臣賊子一一書之亦所以

示戒也而唐太子宏受左傳至於楚世子商臣弑其君願而請更受他書是不知聖人垂

訓之意也近世有建言經筵不進國風是亦不知聖人垂訓之意也
顯音均

定

丁佞反

之方中作于楚宮揆之以日作于楚室樹之榛

栗椅

於宜反

桐梓漆爰伐琴瑟

賦也定北方之宿營室星也此星昏而正中夏正十

月也

此據月令為說與堯典中星異堯典冬至日在虛昏中昴九峯蔡氏傳謂今冬至日在斗昏中

壁約五十一度此正歲差之法七十五年差一度之驗也及至元辛巳方回作山經又云今冬至日在箕

九度昏中室蓋又差矣然則十月定中七月於流火三月三星在天皆是在當時為然耳
於是時

可以營制宮室故謂之營室

輯錄通釋曰夏正十月建亥春秋時十二月也

農事已畢可以興作而人君居必南面故亥月昏時見定星當南方之午位因記此星為每歲營作之候又因號為營室此蓋成周以後之制上考唐虞之時定星以戌月昏中歲久而差至周時定星始以亥月昏中下逮今日此星又以子月昏中矣楚宮楚丘之宮也揆度也樹八

尺之臬

音

而度其日之出入之景以定東西又參日

中之景以正南北也

語出周禮冬官鄭氏注云凡造城郭先以水平地乃於平地之

中央樹臬以繩懸之取其正乃於日出日入之時書記臬景之端却於中臬以繩取景兩端之內一匝規之規之則遠近定而東西審度兩交之間中之以指臬則南北正矣辨錄朱氏曰經之又恐南北之未正又參之以日之景焉冬至日行南陸景長一丈三尺夏至日行北陸景短一尺五寸此日中之景也楚

室猶楚宮互文以協韻耳榛栗二木其實榛小栗大

皆可供籩實

用之賓祭

椅梓實桐皮桐梧桐也

輯錄嚴氏曰陸璣言

有青桐白桐赤桐此中琴瑟者白桐也椅桐梓漆之桐為白桐梧桐生矣之桐為青桐

梓楸之

踈理白色而生子者

輯錄本草注云梓似桐而葉小花紫亦有三種

漆木有

液黏

念平聲

黑可飾器物

輯錄本草注曰漆樹高三二丈皮白葉似椿花似槐以斧

斫其皮開以竹筒承之注滴則成漆也

四木皆琴瑟之材也

輯錄嚴氏曰椅桐可

為琴瑟榛栗可備籩實梓漆可供器用但言伐琴瑟者取成句耳

爰於也○衛為狄

所滅文公徙居楚丘營立宮室國人悅之而作是詩

以美之蘇氏曰種木者求用於十年之後其不求近

功凡此類也

候定星順天時也度日景審地勢也飭種樹備國用也致詳慎之意為永久之

圖新造之時蓋如此

○升彼虛

起居反叶起呂反

矣以望楚矣望楚與堂景山與京

叶居反降觀于桑卜云其吉終然允臧

賦也虛故城也楚楚丘也堂楚丘之旁邑也景測景

以正方面也與既景迺岡之景同

上章揆之以日是定其基址此言景

山與京則又前者未定居時覽山川之影勢

或曰景

音環

山名見商頌京高

丘也桑木名葉可飼蠶者觀之以察其土宜也

輯錄通釋

曰衛詩多言桑如桑中與氓詩及此皆再三言之蓋
衛地跨冀兗二州桑者尤其土所宜而民生之所資
也據楚丘在冀河之東兗州之境則文公所觀所說
其桑土之野乎蘇氏曰降觀其下有桑土可以居民

允信臧善也○此章本其始之望景觀卜而言以至

於終而果獲其善也

文公始欲居望丘又欲居堂邑
既而審察其地決意於楚從而

卜之又吉乃居焉致詳致慎如此是以後來之善符
當時之卜也詳此及下章文意乃詩人於文公殷富

之後追
述之耳

○靈雨既零命彼倌倌

音倌

人星言夙駕說

始說反

于桑田

叶徒

反因

匪直也人秉心塞淵

叶一反

駮來牝三千

叶倉新反

賦也靈善零落也官人主駕者也星見星也說舍止

也秉操塞實淵深也馬七尺以上為駮○言方春時

雨既降而農桑之務作文公於是命主駕者晨起駕

車亟

音往

而勞

去聲

勸之然非獨此人所以操其心者

誠實而淵深也蓋其所畜之馬七尺而牝者亦已至

於三十之衆矣

文公因天時而勸農事如此可謂敦本尚實而憂深思遠矣然不特此時

此事為然育物之驗已如彼則勤民之心可知矣

蓋人操心誠實而淵深則

無所為而不成其致此富盛宜矣

誠實則無虛浮之弊淵深則非淺近

之謀輯錄慈溪黃氏曰匪直也人語難曉至此文義方通嚴氏曰說于桑田是文公能務農重本以蓄育

其人也非特人也文公操心塞實淵深故能致富強至於駉牝三千覺於上下文尤協記曰問

國君之富數馬以對今言駉牝之衆如此則生息之

蕃可見而衛國之富亦可知矣此章又要其終兩言

也於是而文公之興衛也久矣輯錄曹氏曰人君之一心萬事之本也文公之能勤於農桑者此心也

所以致牝馬之多者亦此心也一心之誠實淵深則無所為而不成矣

定之方中三章章七句

首章言其作邑之時二章言其初擇之時末章

言今日富
盛之時

按春秋傳衛懿公九年冬狄入衛懿公及狄

人戰于熒澤而敗死焉

輯錄杜注熒戶宋桓
局反河北地名

公迎衛之遺民渡河而南立宣姜子申以廬

於漕

輯錄傳作
曹衛下邑

是為戴公是年卒立其弟燬

是為文公於是齊桓公合諸侯以城楚丘而

遷衛焉文公大布之衣大帛之冠

輯錄注大
布麤布大

帛厚練盖用諸侯諒闇之
服或曰此文公貶損之意務材訓農通商惠

工敬教勸學

輯錄注通商旅以遷其有無惠百工以賴其罷用敬重五教勸

勉為學

授方任能

授方者授以事為之方也

元年革車三十

乘

輯錄文公是年冬立明年為元年季年在僖公二十五年

季年乃三百

乘

見閔公三年駮牝三千乃詩人稱美之辭不必求其實也集傳引此以見文公興衛

由之

蝦

丁計反

蚪

都動反

在東莫之敢指女子有行遠

子萬反

父母

兄弟

叶侍里反

比也蝦蚪虹也日與雨交脩然成質似有血氣之類

乃陰陽之氣不當交而交者蓋天地之淫氣也

輯錄孔氏

曰雙出色鮮盛者為雄曰虹暗者為雌曰蛻

在東者莫與暮

同

虹也虹隨日

所映故朝西而莫東也

輯錄通釋曰虹之為質不映日不成蓋雲薄漏日日映雨

氣則生也今以水嘆日亦成青紅之暈

○此刺淫奔之詩言蝦蟇在東

而人不敢指以比淫奔之惡人不可道况女子有行

又當遠其父母兄弟豈可不顧此而冒行乎

遠父母兄弟與

泉水竹竿不同彼言不可犯義而歸此言不可犯義而行也知有此義故為賢不知此義則流而為惡無

怪也

○朝子西 于西崇朝其雨女子有行遠兄弟父母叶

補反

比也。隳升也。周禮十輝九曰隳注以為虹蓋忽然而

見如自下而升也。

輯錄輝音運春官注賦禋掌十輝之法以觀妖祥辨吉凶輝謂日旁

之光氣一曰禋陰陽氣相侵赤雲為陽黑雲為陰二曰象如赤鳥三曰雩日旁雲氣刺日四曰監赤雲在

日旁如冠珥五曰闇日月食六曰嘗日月無光七曰彌雲氣貫日而過八曰叙雲氣次序如山在日上九

曰隳虹也十曰想雜氣有似可形像賦音視

崇終也。從旦至食時為終朝。

言方雨而虹見則其雨終朝而止矣。蓋淫慝之氣有

害於陰陽之和也今俗謂虹能截雨信然

淫慝之氣害陰陽之

和淫奔之事害男女之正其類如此輯錄張南軒曰陰陽和則成雨陰氣方凝聚而日氣自他方來感不以正陰受其感其正反為之解散故雨不能成也

○乃如之人也懷昏姻也大無信

叶斯反

也不知命

叶彌反

也

賦也乃如之人指淫奔者而言婚姻謂男女之欲程

子曰女子以不自失為信命正理也○言此淫奔之

人但知思念男女之欲是不能自守其貞信之節而

不知天理之正也。程子曰：人雖不能無欲，然當有以制之，無以制之而惟欲之從，則人道廢而入於禽獸矣。以道制欲，則能順命。輯錄輔氏曰：男女之欲，人所不能無也。要當有以制之，無以制之，則失其貞信之節，而有害於天理之正道。即是理，理即是命。以道制欲，則能順命。去其人欲，則能循乎天理矣。

蝮螫三章章四句

一章賤之二章惡之三章深責之。○增釋許氏曰：衛因淫

邪以致禍敗其亂極矣。文公一轉移之民之知義乃如此。且其辭非止論事常言而達理

知命真君子之言也。

相息亮鼠有皮叶蒲反人而無儀叶牛反人而無儀不死何

為叶吾反

興也相視也鼠蟲之可賤惡者○言視彼鼠而猶必

有皮可以人而無儀乎

此蓋甚言人不如物之意而有無二字相呼為興也

人而無儀則其不死亦何為哉

相鼠有齒人而無止人而無止不死何俟

叶羽已反又音始

興也止容止也俟待也

○相鼠有體人而無禮人而無禮胡不遄死

叶想反

興也體支體也遄速也

相鼠三章章四句

反覆譏刺輔氏謂蝮螭相鼠二詩皆文公化行而人心去

邪反正之時也故其疾惡如此而後篇又繼以好善之詩馬輯錄嚴氏曰凡獸皆有皮齒體獨言鼠舉卑污可惡之物以惡人之無禮也東萊呂氏相鼠之惡無禮何其如是之甚也蓋溺於淫亂之俗不如是不足以自拔也疾惡不深則遷善不力

子子

居熱反

干旄在浚

蘇後反

之郊

叶音高

素絲紕

符至反

之良

馬四之彼姝

赤朱反

者子何以畀

必寐反

之

賦也子子特出之貌干旄以旄牛尾注於旗干之首

而建之車後也

輯錄兩雅鄭
樵云注係也

浚衛邑名邑外謂之郊

紕織組也盖以素絲織組而維之也四之兩服兩驂

凡四馬以載之也

輯錄董氏曰馬在車
中為服在車外為驂

妹美也子指

所見之人也畀與也○言衛大夫乘此車馬建此旌

旄以見賢者彼其所見之賢者將何以畀之而答其

禮意之勤乎

禮著於外意本於中車服之盛如此則
好善有誠矣賢者之忠告當如何哉詩

人所以預
為之謀也

○子子干旗在浚之都素絲組

音祖

之良馬五之彼妹者

子何以予音與之

賦也。旗州里所建鳥隼之旗也。上設旌旄其下繫旂。

旂下屬緣。

音衫。旗之正幅為緣。旂則其末垂者也。

皆畫鳥隼也。

制錄周禮司常

曰鳥隼為旗。考工記曰鳥旗七旂以象。鷩火蓋畫朱鳥及隼於旂。緣之上也。

下邑曰都五

之五馬言其盛也。

馬止於四無五馬六馬之理。詩人特言其盛固不可以辭害意也。

○子子干旌在浚之城。素絲祝之良馬六之彼姝者子。

何以告

姑沃反之

賦也。析羽為旌。干旌蓋析翟羽設於旗干之首也。析

也分其羽而間綴之也輯錄孔疏千之首有旄有羽其下有旒繆周禮注曰徐州夏翟之羽有虞氏以為綏後世或無故染烏羽用之謂之夏采爾雅旄首曰旌則千旌千旌一也既設旒繆有旂旗之稱未設旒繆空有折城都邑也祝屬也六之六馬極其盛而言羽謂之旌

也衛有好賢之大夫畜德之君子而詩又識報施之禮忠告之義皆可為賢矣

千旌三章章六句

以良馬四之五之六之為次序也

此上三詩小序皆以為文公時詩蓋見其列於定中載馳之間故爾他無所考也然衛本以淫亂無禮不樂善道而亡其國今破滅之

餘人心危懼正其有以懲創往事而興起善

端之時也故其為詩如此

蝦蟇疾淫亂也相鼠惡無禮也干旄

樂善道也蓋所謂生於憂患死於安樂者小序之

言疑亦有所本云

載馳載驅

叶祛尤反

言

音彥反

衛侯驅馬悠悠言至於漕

叶祖侯反

大夫跋

蒲未反

涉我心則憂

賦也載則也吊失國曰唁悠悠遠而未至之貌草行

曰跋水行曰涉○宣姜之女為許穆公夫人閔衛之

亡馳驅而歸將以唁衛侯於漕邑

輯錄朱子曰此詩之作在定之方中

之前則未知其為戴公時歟文公時歟

未至而許之大夫有奔走跋涉

而來者夫人知其必將以不可歸之義來告故心以

為憂也既而終不果歸乃作此詩以自言其意爾

輯錄

此詩輔氏所謂夫人傷宗國之亡既歸而許之大夫乃追之于路而告之以不可歸之義觀夫人見其大夫之至亦知其必將以不可歸之義來告而心以為憂則夫人之行亦故知其於義有不可者矣特以惻怛之情有不能自已者此可謂發乎情止乎禮義者也

○既不我嘉不能旋反視爾不臧我思不遠既不我嘉

不能旋濟視爾不臧我思不悶

賦也嘉臧皆善也遠猶忘也濟渡也自許歸衛必有
所渡之水也悶閉也止也言思之不止也○言大夫
既至而果不以我歸為善則我亦不能旋反而濟以
至於衛矣雖視爾不以我為善然我之所思終不能
自己也輯錄許氏曰汝既不以我歸為嘉則信不能
旋反而濟視爾雖不以我為善然我之思則
不遠也
不止也

○陟彼阿丘言采其蟲

音盲叶
謨郎反

女子善懷亦各有行

叶

郎

許人尤之衆穉

直吏反

且狂

賦也偏高曰阿丘蟲貝母主療鬱結之疾善懷多憂

思也猶漢書云岸善崩也

輯錄溝洫志曰引洛水至商顏下岸善崩

行道

尤過也○又言以其既不適衛而思終不止也故其

在塗或升高以舒憂想之情或采蟲以療鬱結之疾

蓋女子所以善懷者亦各有道而許國之衆人以爲

過則亦少不更事而狂妄之人爾許人守禮非穉且

狂也但以其不知已情之切至而言若是爾然而卒

不敢違焉則亦豈真以為穉且狂哉

○我行其野芄芃

蒲紅反

其麥

叶訖反

控苦

貢反

于大邦誰因

誰極大夫君子無我有尤

叶于反

百爾所思

叶新反

不如我

所之

賦也芃芃麥盛長貌控持而告之也因如因魏莊子

之因

幘錄

左傳襄公四年無終子使孟樂如晉因魏莊子納虎豹之皮以請和諸戎注云因緣也緣

此而

至

極至也大夫即跋涉之大夫君子謂許國之

衆人也○又言歸途在野而涉芃芃之麥又自傷許

國之小而力不能救故思欲為之控告于大邦而又
未知其將何所因而何所至乎大夫君子無以我為
有過雖爾所以處此百方然不如使我得自盡其心
之為愈也增釋許氏曰又設行野見麥之意且憂控
大國誰因誰極乎大夫君子無以我有過
蓋百爾所思不
如我之自往也

載馳四章二章章六句二章章八句一章出而
在道之時

二章大夫追及之時三章旋反
在道之時四章歸而將至之時

事見春秋傳

見閔公二年

舊說此詩五章一章六

句二章三章四句四章六句五章八句蘇氏
合二章三章以為一章按春秋傳叔孫豹賦
載馳之四章而取其控于大邦誰因誰極之

意

襄十
九年

與蘇說合今從之范氏曰先王制禮

父母沒則不得歸寧者義也雖國滅君死不
得往赴焉義重於亡故也

夫人之辭哀痛迫
切若不能以為心

也然使得歸衛亦何補於滅亡哉婦人之仁
先聖王之禮不待較而輕重可知馳驅已出
已犯義矣聞義而能自克不害其為賢也故
聖人取之如此輯錄朱子曰聖人列泉水於

前所以著禮之經列載馳於後所以盡事之
變夫宗國覆滅莫大之變傾以父母既終而
不得歸則事變之微於是可知矣然則許穆
夫人亦賢矣哉又曰宣姜生衛文公宋桓夫
人許穆夫人衛壽子以此觀之
則人生自有秉彜不係於氣類

鄘國十篇二十九章百七十六句

衛一之五

瞻彼淇奧

於六反

綠竹猗猗

於宜反叶於何反

有匪君子如切如

磋如琢如磨瑟兮僖

遐版反

兮赫兮咺

况晚反

兮有匪君子

終不可諼

况元反叶况速反

兮

興也淇水名奧隈

音隈也

輟錄隈水曲爾雅厓內為奧外為隈

綠色也淇

上多竹漢世猶然所謂淇園之竹是也

輟錄漢志武帝塞瓠子決

河薪柴少乃下淇園之竹為矢百餘萬批

音健又寇猗猗始生柔

弱而美盛也匪斐通文章著見之貌也君子指武公

也

輟錄孔氏曰武公和僖侯子

治骨角者既切以刀斧而復磋以

鑢錫治玉石者既琢以槌鑿而復磨以沙石言其德

之脩飭有進而無已也

輟錄朱子曰切琢皆截物使成形質也磋磨皆治物使其

滑澤也切而復磋琢而復磨言治之有叙而益致其精也

瑟矜莊貌憫威嚴貌亘

宣著貌謏忘也○衛人美武公之德而以綠竹始生

之美盛興其學問自脩之進益也

以始生之美盛有進益之意故以為

興大學傳曰如切如磋者道學也如琢如磨者自脩

也

此進德之事學問屬知自脩屬行知行二者並進也輯錄朱子曰道言也學謂講習討論之事自脩

者省察克治之功又曰既學而猶慮其未至則復講習討論以求之猶治骨角者既切之而復磋之既脩而猶慮其未至則又省察克治以終之猶治玉石者既琢之而復磨之問道學自脩此詩人美武公之本

音邪曰武公大段是有學問底人抑之一詩義理精密詩中如此者甚不易瑟兮僖兮者

恂峻慄也赫兮咺兮者威儀也

輯錄朱子曰瑟嚴密貌僖武毅貌赫咺宣

著盛大之貌恂慄戰懼也威可畏也儀可象也○恂慄者敬之存於中也威儀者敬之見於外也皆以成德氣象言而進德工夫亦可見矣有斐君子終不可諼兮者道盛德

至善民之不能忘也

止盛德之感人心如此○大學於止至善之傳引此詩又引之以

釋此至善乃大學之成功聖賢之能事則武公之德固不可以淺近窺矣輯錄朱子曰盛德至善蓋人心之同然聖人亦先得之而其充盛宣著又如此是以民皆仰之而不能忘也盛德以身之所得而言也至善以理之所極而言也輔氏曰觀大學傳曾子所以解此詩首章後六句之說字義明白而旨意詳備愈讀愈有意味此方可謂之善說詩蓋後之說詩者詳於訓詁則或略泥於旨意則或遺於訓詁惟曾子則於字義旨意兩皆極其至也○贈釋許氏曰武公之所以有德全在切磋琢磨四字惟其工夫如此精密

故有瑟僖赫咺之效存於內者周故發於外者著下
二句却就他人心上說謂此君子不可忘也又曰此
章訓詁解義皆不及大學詳明蓋大學
朱子晚年之書讀此章者當從大學

○瞻彼淇奧綠竹青青

子丁反

有匪君子充耳琇瑩

音營會

古外反

弁如星瑟兮僖兮赫兮咺兮有匪君子終不可諼

兮

興也青青堅剛茂盛之貌充耳瑱音殿也琇瑩美石也

天子玉瑱諸侯以石會縫

去聲

也弁皮弁也以玉飾皮

弁之縫中如星之明也

輯錄孔疏弁師注云會縫也皮弁之縫中每貫結五采玉

十二以為飾謂之琪武公諸侯則王用三采而琪飾七也

○以竹之堅剛茂盛興

其服飾而見其德之稱也

堅剛茂盛亦有尊大威嚴之意故以為興凡服飾之

尊嚴可知○首章先言進德後言成德義兼首尾此與下章專主成德言故不及乎切磋琢磨也

○瞻彼淇奧綠竹如簣

音責叶側歷反

有匪君子如金如錫如

圭如璧寬兮綽兮猗

於綺反

重較

直恭反古岳

兮善戲謔兮

不為虐兮

興也簣棧

潺上聲

也

檀弓注棧謂床第也

竹之密比

去聲

似之則盛

之至也金錫言其鍛鍊之精純

鍛鍊已至於精純則成功之極也

圭

壁言其生質之溫潤

生質能全其溫潤則復其本然矣

寬宏裕也綽

開大也猗嘆辭也重較狎士之車也

武公嘗入相為王狎士故乘重

較之

較兩轡上出軾者謂車兩傍也

轡音奇兩旁植木也語見周禮

輿人注疏云較重兩旁豎之者兩轡上出軾者以較之兩頭皆置于轡上二木相附故據兩轡出軾而言也○周禮無重較單較之文訓詁謂植木之上出兩橫木在下者為軾上者為較謂之重較者軾上有較層出也此說重較稍明而與周禮略異姑存之
詩詁云車廣六尺六寸深四尺軾去輿高三尺三寸較去軾又高二尺二寸通高五尺
五寸立則憑較應為敬則俯憑軾
善戲謔不為虐者
言其樂易而有節也

輯錄程子曰言其樂易而以禮中節不至於過是不為虐也

○以竹之至盛興其德之成就

至盛則無以加亦有成就之意故以為興

而又言其寬廣而自如

在興而寬綽心廣體胖是也

和易而中節

也

戲謔而不為虐笑語卒獲出言有章是也

蓋寬綽無斂束之意戲謔非

莊厲之時皆常情所忽而易致過差之地也然猶可

觀而必有節焉則其動容周旋之間無適而非禮亦

可見矣

前二章猶有主敬之功此則無事矜持而皆出於自然也

禮曰張而不弛

文武不能也弛而不張文武不為也一張一弛文武

之道也此之謂也

語出雜記凡人斂束之時猶弓之弛有德之人

嚴而泰和而節自不倚於一偏也輯錄鮮願曰首章以竹之美盛興其德之進脩卒章以竹之至盛興其德之成就合二章而並觀之所以能有鍛鍊之精純者由其知行之並進也所以能全其生質之溫潤者由其表裏之相符也寬廣者矜莊之反矜莊而又寬廣則是寬而有制也和易者威嚴之反威嚴而又和易則是嚴而能泰也此所以為德之成也果能是則其謂之睿聖也亦可以無愧矣

淇奥三章章九句

一章言由進德而成德也二章以成德言也三章極言盛德之

至也

按國語武公年九十有五猶箴傲于國曰自

卿以下至于師長士

師長大也

苟在朝者無謂

我老耄而舍我必恪恭於朝以交戒我遂作

懿懿當讀為抑

戒之詩以自警而賓之初筵亦武

公悔過之作則其有文章而能聽規諫以禮

自防也可知矣衛之他君蓋無足以及此者

故序以此詩為美武公而令從之也

有文章於瑟間

赫咺見之能聽規諫以禮自防切磋琢磨見之增釋許氏曰一章總言其講學自脩之

功敬德容儀之盛二章止言正其衣冠則其德容自充蓋至此德成矣三章言守之於心

者貞剛如金錫施之於四體者溫粹如圭璧至於猗較則寬綽戲謔則不虐蓋動作之間

無所往而非
德容之盛也

考槃在澗

叶居碩反

人之寬

叶區權反

獨寐寤言永矢弗諼

况元

反

賦也考成也槃盤桓之意言成其隱處之室也陳氏

曰考扣也槃罷名蓋扣之以節歌如鼓盆拊缶之為

樂

音洛

也二說未知孰是山夾水曰澗碩大寬廣永長

矢誓諼忘也○詩人美賢者隱處澗谷之間而碩大

寬廣無戚戚之意雖獨寐而寤言猶自誓其不忘此

樂也

輯錄嚴氏曰碩人之寬易所謂肥遯者也○增釋許氏曰考槃在澗可謂幽僻碩德之人居之

則見其寬廣之意如此

○考槃在阿碩人之邁

苦禾反

獨寐寤歌永矢弗過

古禾反

賦也曲陵曰阿邁義未詳或云亦寬大之意也永矢

弗過自誓所願不踰於此若將終身之意也

輯錄輔氏曰寬

大自樂若將終身馬蓋無入而不自得也

○考槃在陸碩人之軸獨寐寤宿永矢弗告

姑沃反

賦也高平曰陸軸盤桓不行之意寤宿已覺而猶卧

也弗告者不以此樂告人也

素位而行遊世無悶於考槃之詩見之

考槃三章章四句

一章其志堅二章其願足三章其樂深輯錄解頤曰賢者

隱處於澗谷之間始而曰弗謏謂其心之不忘乎此也繼而曰弗過謂所願不踰於此也

終而曰弗告謂不以此樂告人也

碩人其碩

其機反

衣

於既反

錦褰

苦迥反

衣齊侯之子衛侯之

妻東宮之妹邢侯之姨譚公維私

息夷反

賦也碩人指莊姜也碩長貌褰禪

單也

也錦衣而加褰

焉為其文之太著也

輒錄朱子曰褰儀禮作景禮記作綱古註以為禪衣所以褰錦

衣者沈存中謂褻與褻同是用褻麻織布為之不知是否嚴氏曰褻以殺為之東宮太子所

居之宮齊太子得臣也繫太子言之者明與同母言

所生之貴也女子後生曰妹妻之姊妹曰姨姊妹之

夫曰私邢侯譚侯皆莊姜姊妹之夫互言之也

輯錄蘇氏

曰邢周公之後謂近齊

諸侯之女嫁於諸侯則尊同故歷言之

輯錄通釋曰歷言此者以見莊姜之姊妹與莊公之姻婭其尊皆同也

○莊姜事見邶

風綠衣等篇春秋傳曰莊姜美而無子衛人為之賦

碩人即謂此詩而其首章極稱其族類之貴以見其

為正嫡小君所宜親厚而重歎莊公之昏惑也

輯錄孔氏

曰其父母兄弟皆正大如此君何為不答之乎嚴氏曰詩人不直言莊姜不見答之事但首章歷述其親族欲讀之者知其為莊姜則不見答之事國人自知之不待察察言之矣

○手如柔荑

徒兮反

膚如凝脂領如蝤

似修反

蠐

齊音齒如瓠

戶故反

犀螭

泰音

首蛾

我波反

眉巧笑倩

七薦反

兮美目盼

匹覽反叶

匹見反兮

賦也茅之始生曰蕓言柔而白也凝脂脂寒而凝者

亦言白也領頸也蝤蠐木蟲之白而長者

輯錄本草郭璞注腐

木根下有之瘦而白瓠犀瓠中之子方正潔白而比次整齊也

螭如蟬而小其額廣而方正輯錄蜻蜻蛾蠶蛾也其眉

細而長曲倩口輔之美也

輯錄孔氏曰服虔云輔上領車也是牙外之皮膚頰

下之別名也盼黑白分明也○此章言其容貌之美猶前

章之意也

○碩人敖敖五毛反說始稅反于農郊叶音高四牡有驕起橋反叶

高音朱幘符云反鑣鑣表驕反叶音褒翟茀音弗以朝直遙反叶大夫

夙退無使君勞

賦也教教長貌說舍也農郊近郊也四牡車之四馬

驕壯貌幘鑣飾也鑣者馬御外鐵人君以朱纏之也

鑣鑣盛也

重言之則見其為盛

翟翟車也夫人以翟羽飾車

蔽也婦人之車前後設蔽

輯錄孔氏曰婦人不露見車前後設幃謂之弗因以

翟羽為飾

夙早也玉藻曰君日出而視朝

輯錄鄭氏曰朝內朝路寢門外

之正朝也

退適路寢聽政使人視大夫大夫退然後適小

寢釋服

輯錄鄭氏曰小寢燕寢也陳氏曰視朝而見羣臣所以通上下之情聽政而適路寢所以

決可否之計釋服釋朝服也

○此言莊姜自齊來嫁舍止近郊乘

是車馬之盛以入君之朝國人樂得以為莊公之配
故謂諸大夫朝於君者宜早退無使君勞於政事不
得與夫人相親而歎今之不然也

○河水洋洋北流活活

古濶反叶
戶劣反

施罟

孤音

濊濊

呼活反
叶許月

反鱣

陟連反

鮪

于軌反

發發

補末反叶
方月反

葭

加音

莢

他覽反

揭揭

居謂

反

庶姜孽孽

魚竭反

庶士有暵

欺列反

賦也河在齊西衛東北流入海洋洋盛大貌活活流

貌施設也罟魚罟也濊濊罟入水聲也

輯錄說文曰
濊礙流也

鱣魚似龍黃色銳頭口在頷下背上腹下皆有甲大

者千餘斤

輯錄孔氏曰鱣魚體有邪行甲無鱗大者長二三丈江東呼為黃魚鮪似鱣

而小色青黑

輯錄孔氏曰陸璣云鮪頭小而尖似鐵甕口亦在頷下其甲可以摩薑大者

不過七八尺一名駱肉發發盛貌莢亂碩去聲也亦謂

之荻揭揭長也庶姜謂姪姊孽孽盛飾也庶士謂媵

臣竭武貌○言齊地廣饒而夫人之來士女佼好禮

儀盛備如此亦首章之意也

碩人四章章七句

一章言其族類之貴二章稱其容貌之美三章言其嫁時

車馬之盛四章言其嫁時所見地利之饒從
媵之美也哀傷悼惜皆在言外輯錄輔氏曰
觀叩風燕燕等篇則莊姜之德行文章皆未
易及而此詩不之言何也朱子曰此但指其
人所易見者以刺莊公之昏惑而
不知耳莊姜之美則固不止此也

氓之蚩蚩

尺之反

抱布貿

莫豆反

絲

叶新齊反

匪來貿絲來即我

謀

叶謀悲反

送子涉淇至于頓丘

叶祛奇反

匪我愆期子無良媒

悲

叶謨反

將

七羊反

子無怒秋以為期

賦也氓民也蓋男子而不知其誰何之稱也

輯錄朱子曰始

見其來莫知其為誰何也既與蚩蚩無知之貌蓋怨
之謀則爾汝之矣此言之序也

而鄙之也布幣

帛錄幣者布帛之名

貿買也貿絲蓋初夏之時

也頓丘地名

輯錄嚴氏曰在朝歌之東漢志陳郡有頓丘縣師古云以丘為縣也丘一成為

頓丘謂一

愆過也將願也請也○此淫婦為人所棄

而自叙其事以道其悔恨之意夫既與之謀而不遂
往又責所無以難其事再為之約以堅其志此其計
亦狡矣以御虫虫之氓宜其有餘而不免於見棄蓋
一失其身人所賤惡始雖以欲而迷後必以時而悟
是以無往而不困耳

穢惡之人雖奸無益也

士君子立身一敗

而萬事瓦裂者何以異此可不戒哉

朱子又推之以戒士君子蓋廣

說詩之法也

○乘彼塉

俱毀反

垣音袁以望復關

叶圭反

不見復關泣涕漣

漣

音連

既見復關載笑載言爾卜爾筮體無咎言以爾車

來以我賄

呼罪反遷

賦也塉毀垣墻也復關男子之所居也不敢顯言其

人故託言之耳龜曰卜著曰筮體兆卦之體也

輯錄音

尸蒿屬龜莢傳曰天下和平王道得而賄財遷徙也著莖長丈生滿百莖下必有靈龜守之

○與之期矣故及期而乘坭垣以望之既見之矣於

是問其卜筮所得卦兆之體若無凶咎之言

輯錄輔氏曰此

章可見古人之尚卜筮然使其知易為君則以爾之

子謀不為小人謀則亦不敢求之筮矣

已上二章皆述其初介時事以起怨悔之端

○桑之未落其葉沃若于

音吁下同

嗟鳩兮無食桑葚

音甚叶如

林于嗟女兮無與士耽

叶持林反

士之耽兮猶可說也女之

耽兮不可說也

比而興也沃若潤澤貌鳩鵲

音

鳩也似山雀而小短

尾青黑色多聲

輯錄嚴氏曰即莊子所謂鷦鷯也郭璞云似山鵲呼為鷽鷽音骨嘲本草

曰鷽鷽尾短黃色多聲

甚桑實也鳩食甚多則致醉耽相樂也

說解也○言桑之潤澤以比已之容色光麗然又念

其不可恃此而從

音縱

欲忘反故遂戒鳩無食桑甚以

興下句戒女無與士耽也

鳩食甚則醉女悅士則醜皆可戒者也此以欲不可

縱之意而為興輯錄耽溺好也

士猶可說而女不可說者婦人被棄

之後深自愧悔之辭主言婦人無外事唯以貞信為

節一失其正則餘無足觀爾不可便謂士之耽惑實

無所妨也

此亦推廣言之此章悔也輯錄通釋曰集傳所謂主言者蓋以此婦立言之意專主

於言婦人不可一失其節故以辭意抑揚重於女而輕於男亦非男有可耽之理而無所妨玩詩文猶之

一字意亦可見讀者當不失性情之正也

○桑之落矣其黃而隕

叶于反

自我徂爾三歲食貧淇水

湯湯

音漸反

車帷裳女也不與

叶師反

士貳其行

下孟反

戶郎反士也罔極二三其德

比也隕落徂往也湯湯水盛貌漸漬也帷裳車飾亦

名童容婦人之車則有之

輯錄孔氏曰以帷障車之傍如裳以為容飾故謂童

容爽差極至也○言桑之黃落以比已之容色凋謝

遂言自我往之爾家而值爾之貧於是見棄復乘車

而度水以歸復自言其過不在此而在彼也

此章怨也

輔氏曰女也不爽此但言其誓約之言不差耳豈不悔其初之失哉雖云曲不在已殊不知始既如此則其終固宜然也詩緝曰士貳其行士心無極不可測知由其德二三不專於一故也

○三歲為婦靡室勞矣夙興夜寐靡有朝

叶直豪反

矣言既

遂矣至于暴矣兄弟不知咥

許意反

其笑

叶音燥

矣靜言思

之躬自悼矣

賦也靡不夙早興起也啞笑貌○言我三歲為婦盡
心竭力不以室家之務為勞早起夜卧無有朝旦之
暇與爾始相謀約之言既遂而爾遽以暴戾加我兄
弟見我之歸不知其然但啞然其笑而已盖淫奔從
人不為兄弟所齒故其見棄而歸亦不為兄弟所恤
理固有必然者亦何所歸咎哉但有痛悼而已此章
思也

○及爾偕老老使我怨淇則有岸

叶魚
戢反

隰則有泮

叶音畔
四

見總角之宴言笑宴宴叶伊反信誓旦旦叶得反不思其反

絢叶孚反反是不思叶新反亦已焉哉叶將反

賦而興也及與也泮涯也高下之判也總角女子未

許嫁則未笄但結髮為飾也

孔氏曰但結其髮為兩角晏晏和柔

也旦旦明也○言我與汝本期偕老不知老而見棄

如此徒使我怨也

輯錄前章以桑之意怨嘆比其色之衰此章言老使我怨而又言總

角之宴則與三歲食貧三歲為婦若可疑者故詩緝謂未笄為氓之婦三年便見棄不應便老也通釋曰

三歲者但言其在夫家貧勞之歲月耳

淇則有岸矣隰則有泮矣而我

總角之時與爾宴樂言笑成此信誓曾不思其反復

以至於此也此則興也

地有限止而可見事有終窮而不思此反其意以為興也

反字正與岸泮二字語相應

既不思其反復而至此矣則亦如之

何哉亦已而已矣傳曰思其終也思其復也思其反

之謂也

縱欲敗禮失身從人此豈永終知敵之謂哉人窮反本此章可見此章悔也輯錄襄公二

十五年注曰思使終可成思其可復行也

氓六章章十句

一章約奔二章遂奔三章悔奔四章旋反在道而怨之深五章

被棄歸宗而怨與悔俱甚六章思其始奔而悔無及也輯錄劉執中曰夫婦者五品之本

匹配雖自於人謀義理實根於天地順其道者足以安於其位逆其理者無以保於其生蓋肇有人倫以來未有違理犯義終其身而弗悔者此砥詩之所由作也通釋曰此詩及邨谷風皆棄婦所作故其辭意多同桑之黃隕即涇濁之色也食貧靡勞即方舟泳游之苦也至於暴矣即有沈有潰之意也倚老而使我也怨即既生育而比予于毒也然則宴爾新昏以我御窮則其過今在於夫女之耽兮不可說也則其過昔在於已今之過在夫故可責其不念昔者之來堅昔之過在已故終於自悔昔者之不思其反此詩自悔之深固不得如谷風歸怨之深也堅音戲

籊籊

他歷反

竹竿以釣于淇豈不爾思遠莫致之

賦也籊籊長而殺

去聲也

輯錄殺衰小之也謂釣竿長而根大其末漸漸而衰小

竹衛物淇衛地也○衛女嫁於諸侯思歸寧而不可

得故作此詩言思以竹竿釣于淇水而遠不可至也

輯錄輔氏曰豈不爾思者言固不能不思也遠莫致之者以義有不可故託以遠而不能致耳

○泉源在左淇水在右

叶羽軌反

女子有行遠

于萬反

父母兄

弟

叶滿彼反

賦也泉源即百泉也在衛之西北而東南流入淇故

曰在左淇在衛之西南而東流與泉源合故曰在右

增釋鄱陽張氏曰泉水即衛州共城之百泉淇水出相州林慮縣東流泉水自西北來注之 ○思

二水之在衛而自歎其不如也

輯錄輔氏曰女子有行遠父母兄弟安之

辭之

○淇水在右泉源在左巧笑之嗇

七可反

佩玉之儺

乃可反

賦也嗇鮮白色笑而見齒其色嗇然猶所謂粲然皆

笑也

增釋穀梁傳軍人粲然皆笑粲明也笑而露其齒白也

儺行有度也○承

上章言二水在衛而自恨其不得笑語遊戲於其間

也

○淇水漻漻

音由

檜楫松舟駕言出遊以寓我憂

賦也漻漻流貌檜木名似柏

輯錄毛氏曰檜柏華松身孔氏曰禹貢枯栢注

栢葉松身曰枯與此一也

楫所以行舟也○與泉水之卒章同意

竹竿四章章四句

一章歸而亂辭以決之二章思歸而以正義決之三章四

章則思不能忘而義若不能決也然則所以自處者有道矣○竹竿泉水載馳三詩為一類載馳之詩其情迫切此與泉水其詞緩勢不同也然載馳驅而出矣聞大夫之言而後反泉水亦與諸姬伯姊謀而後知義理之必然而無疑此則斷之以心不待謀而後決告而後知此之泉水載馳尤為賢也

芄

音丸

蘭之支童子佩觿

許規反

雖則佩觿能不我知容兮

遂兮垂帶悸

其季反兮

興也芄蘭草一名蘿摩蔓生斷之有白汁可啖

音淡支

枝同觿錐也以象骨為之所以解結成人之佩非童

子之飾也

此詩不知所謂則其起興之意難曉若以

而枝葉長蔓本不稱末故以興童稱

知猶智也言其

才能不足以知於我也容遂舒緩放肆之貌悸帶下

垂之貌

○芄蘭之葉童子佩韞

失涉反

雖則佩韞能不我甲

叶占反

容兮遂兮垂帶悸兮

興也韞決也以象骨為之著

音研

右手大指所以鈎弦

闔體

闔即開字體弓體也

鄭氏曰沓也即大射所謂朱極三

是也以朱韋為之用以彊

音振

沓右手食指將去

名指也

朱韋皮之染赤色者也以朱韋為之故名朱極彊沓者包之也包三指所以遂弦輯錄鄭

氏曰極猶放也所以韞指利放弦也三者食指將指無名指

甲長也言其才能不

足以長於我也

射者男子之事尤非童孺所能者才能甚不稱其佩服也

光蘭二章章六句

佩鵬已不稱
佩韞尤不稱

此詩不知所謂不敢強解

輔氏曰此亦必刺
在其位者童孺無

能惟儀容之可觀耳然未知其誰何也○增
釋詩氏曰光蘭柔弱之草其枝葉不足取以
與童孺無才智不足尚故雖服成人之佩而
智不足以知我才不足以長我且猶不能自
省而舒緩放肆垂帶悸然以自得蓋其德不
稱於服飾故為人指議如此其必有所託而
言也蓋朱子謂不
可強解姑存于此

誰謂河廣一葦杭

戶郎

之誰謂宋遠跂

丘豉

予望之

賦也葦蒹葭之屬杭度也衛在河北宋在河南

衛滅
於狄

桓公迎其遺民渡河而南襄公即位則衛國在河南矣此恐當作與體不必以渡河為說也輯錄左傳閔公二年冬桓公逆衛立戴公卒立文公僖公元年即文公之元年至二十五年文公卒成公立是時衛在河南十
年矣○宣姜之女為宋桓公夫人人生襄公而出歸于

衛襄公即位夫人思之而義不可往蓋嗣君承父之

重與祖為體

祖孫昭穆同故以祖為體輯錄孔疏體上有一字

母出與廟絕

不可以私反

不得供祭祀則與廟絕而義不可反矣

故作此詩言誰謂

河廣乎但以一葦加之則可以渡矣誰謂宋國遠乎

但一跂足而望則可以見矣

輯錄嚴氏曰跂舉踵也脚根不著地明非

宋遠而不可至也乃義不可而不得往耳

○誰謂河廣曾不容刀誰謂宋遠曾不崇朝

賦也小船曰刀不容刀言小也崇終也行不終朝而

至言近也

輯錄嚴氏曰刀船古字通用輔氏曰但言非河之廣而不可渡非宋之遠而不可至

以極其情思焉而終不明言其義之不得往也此意最可玩范氏以為知禮而畏義者得之矣

河廣二章章四句

既量於目力知其近又量於足力知其近

范氏曰夫人之不往義也天下豈有無母之

人歟有千乘之國而不得養其母則人之不

幸也為襄公者將若之何生則致其孝沒則

盡其禮而已

呂氏曰說苑載襄公為太子請於桓公立目夷公問何故對曰

臣之舅在衛愛臣若終立則不可往矣襄公欲見母也而曰見舅蓋恐傷其父之志也母之慈子之孝皆止於善而不敢過焉不幸而處母子之變者可以觀矣東匯陳氏曰禮為出母期而為父後者無服心喪而已愚謂如此則襄公之於其母生不可見死不可為服矣死以心喪為禮而生其孝未之詳也豈惟終身永慕以志養志乎衛有婦人

之詩自共姜至於襄公之母六人焉

輯錄衛有婦人

之詩六人皆止於禮義謂共姜莊姜也許穆夫人也宋桓夫人也泉水之女也竹竿之女

也皆止於禮義而不敢過也夫以衛之政
教淫僻風俗傷敗然而女子乃有知禮而
畏義如此者則以先王之化猶有存焉故
也輯錄輔氏曰范氏為襄公處者得其義
矣所謂先王之化猶有存焉即大序所
謂止乎禮義先王之澤也必如此等詩方
可當之解頤曰母出固與廟絕而母之與
子初無絕道也母之轍雖不可以私返而
子之使則未嘗不可以私往也歲時問安
之使交錯於道路而一草一木之微必先
以奉乎親焉則子之心可以無愧而母之
心亦可以少慰矣

伯兮

丘列反

兮邦之桀兮伯也執殳

市朱反

為去聲

王前驅

賦也伯婦人目其夫之字也謁武貌桀才過人也殳

長丈二而無刃

輯錄說文殳積竹為之冬官廬人殳長尋有四尺即丈二尺殳兵同強殳

無刃可數打人故謂之殳兵同強上下同堅勁也

○婦人以夫久從征役而

作是詩言其君子之才之美如是今方執殳而為王

前驅也

此以侯國之人供天子之役也才美如此而執殳前驅則用之非其義矣

○自伯之東首如飛蓬豈無膏沐誰適都歷為容

反

賦也蓬草名其華如柳絮聚而飛如亂髮也膏所以

澤髮者沐滌首去垢也適主也○言我髮亂如此非無膏沐可以為容所以不為者君子行役無所主而

為之故也傳曰女為說已容

輯錄晉豫讓云士為知己者死女為說已者容

輔氏曰此其真情也呂氏曰膏所以膏首面沐蓋潘也左傳遺之潘沐潘音番米瀾也內則潘澌米汁也

○其雨其雨杲杲

古老反

出日願言思伯甘心首疾

比也其者冀其將然之詞○冀其將雨而杲然日出以比望其君子之歸而不歸也是以不堪憂思之苦而寧甘心於首疾也

憂思之苦本不能堪而今人首疾也但我則思而又思寧甘心

首疾而不辭耳此章
辭意當與下章例之

○焉於虔得謏况表草言樹之背音願言思伯使我心

癘呼內

賦也謏忘也謏草合歡食之令人忘憂者輯錄本草注曰一名

鹿蔥其花名宜男懷胎婦人佩其花輯錄生男也萱草味甘令人好歡樂忘憂背北堂也孔氏

曰房室所居之地總謂之堂房半以北為北堂房半以南為南堂通釋曰北堂背南向北故為之背癘

病也○言焉得忘憂之草樹之北堂以忘吾憂乎輯錄

朱子曰北堂蓋古然終不忍忘也是以寧不求此草之植花草之處

而但願言思伯雖至於心瘁而不辭耳

寧使心疾而伯不可忘也

心瘁則其病益深非特首疾而已也

伯兮四章章四句

一章憫夫之才二章明已之志三章四章則極其憂思之

苦而言也

范氏曰居而相離則思期而不至則憂此人

之情也文王之遣戍役

采薇出車杖杜之詩是也此用古注故以

為文王時作

周公之勞歸士

東山皆叙其室家之

情男女之思以閔之故其民悅而忘死聖人

能通天下之志是以能成天下之務兵者毒

民於死者也孤人之子寡人之妻

殺人之父則孤人子

殺人之夫傷天地之和召水旱之災故聖王則寡人妻

重之如不得已而行則告以歸期念其勤勞

哀傷慘怛不啻在已是以治世之詩則言其

君上閔恤之情亂世之詩則錄其室家怨思

之苦以為人情不出乎此也

輯錄輔氏曰范氏之說誠足以

詔萬世人君而知此義則知謹重於用兵矣至所謂治世之詩則述其君上閔恤之情亂

世之詩則錄其室家怨思之苦以為人情不出乎此者又深得聖人錄詩之意李氏曰古者師出不逾時所以重民力也春秋時用兵多矣未有書師還者獨於莊公八年書之以見適時不返也然采薇之役逾年而歸東山之師三年而至詩人乃美之者蓋用之得其道則民無怨懟之心不得其道則適時之久而人怨矣

有狐綏綏在彼淇梁心之憂矣之子無裳

比也狐者妖媚之獸綏綏獨行求匹之貌

淫奔之詩每以狐比

齊之南山亦是類也輯錄嚴氏曰狐性淫又多疑石綏綏然獨行而遲疑有求匹之意喻無妻之人也

絕水曰梁

人於淺水以石障水而取魚也

在梁則可以裳矣○國亂

民散喪其妃

同配

耦有寡婦見鰥夫而欲嫁之故託言

有孤獨行而憂其無裳也

濟未及梁未可裳也既及梁矣則可以裳矣

○有狐綏綏在彼淇厲心之憂矣之子無帶

叶丁計反

比也厲深水可涉處也帶所以申束衣也

申重也衣已束矣又

用帶以束之也○增釋鄱陽張氏曰凡帶有二革帶加裳上所以懸佩大帶加衣上所以束衣而為禮也

在厲則可以帶矣

水自帶已上曰厲必脫去其帶而渡之既厲矣則可以束帶矣

○有狐綏綏在彼淇側心之憂矣之子無服

叶蒲北反

比也濟乎水則可以服矣

梁與厲皆淇側也裳與帶皆所服者也此兼上兩章

之意

有狐三章章四句

著裳然後加帶故用裳與帶為先後而又言服以魚之

投我以木瓜

叶反

報之以瓊琚

音居

匪報也永以為好

呼報

反也

比也木瓜楸

音茂

木也實如小瓜酢可食

輯錄

本草木狀如柰花

生於春末深紅色其實大者如瓜小者如拳爾雅謂之楸徐氏曰瓜有瓜瓠桃有羊桃李有雀李此皆枝

蔓也故言木瓜木

瓊玉之美者琚佩玉名

輯錄羅氏曰琚處佩

之中所以貫纁珠而上繫於珩下維璜衡牙者也

○言人有贈我以微物我

當報之以重寶而猶未足以為報也但欲其長以為

好而不忘耳疑亦男女相贈答之詞如靜女之類

增釋

許氏曰此雖男女贈答之辭然推而充之亦足以為法蓋彼施者雖輕我報者當重不以彼已相較而效之此厚之道也而猶曰匪報蓋如此則可永其好也

○投我以木桃報之以瓊瑶匪報也永以為好也

比也瑶美玉也

○投我以木李報之以瓊玖

音久叶舉里反

匪報也永以為好

也

比也玖亦玉名也

輯錄說文曰玖玉黑色孔氏曰丘中有麻傳云玖石次玉者是玖非

全玉也

木瓜三章章四句

反覆咏嘆

衛國十篇三十四章二百三句

張子曰衛國地濱大河其地土薄故其人

氣輕浮其地平下故其人質柔弱其地肥

饒不費耕耨故其人心怠惰其人情性如

此則其聲音亦淫靡故聞其樂使人懈慢



而有邪僻之心也鄭詩放此衛多君子於詩可見如淇
澳之武公固非諸國所有而文公興衛亦
卓卓可稱者其餘如凱風之孝子北門之
忠臣北風之智者干旄之賢大夫簡兮之
賢伶官考槃之隱君子豈不特然於變風
時其次則乘舟之爭死者亦有可憫之一
節又如賢婦人六人則莊姜共姜許穆宋
桓夫人泉水竹竿之女也若燕燕之能淑
慎伯兮之守專一雄雉之知德行谷風被
棄而有同死之德音又在六婦人以外然
則衛不特多君子而已亦可謂多賢婦人
矣

詩經疏義會通卷三